

একবার তাকালে আর চোখ ফিরিয়ে নিতে ইচ্ছা করে না। এই ভদ্রলোক সেরকম। বাসে এই ভদ্রলোকের পাশে বসলে কোনো মেয়েই অস্বস্তি বোধ করবে না।

ভদ্রলোক শামাকে দেখে চট করে দাঁড়িয়ে পড়লেন। গম্ভীর গলায় বললেন, এক্সকিউজ মি। আপনি কি মীরার বান্ধবীদের একজন?

জি।

আমি আমার চশমা তিনতলার খাবার টেবিলে রেখে বাথরুমে হাত মুখ ধুতে গিয়েছিলাম। হাত মুখ ধুয়ে এসে দেখি চশমাটা নেই। আমার মাইওপিয়া আছে। চশমার পাওয়ার শ্রি ডাইওপটার। আমার খুবই অসুবিধা হচ্ছে। এর মধ্যে সিডিতে দু'বার হোঁচট খেয়েছি। আমার ধারণা মীরার বান্ধবীরা মজা করার জন্যে চশমা লুকিয়ে ফেলেছে। এটা ঠিক না। আপনি মীরার বান্ধবীদের একজন। আপনি কি চশমাটা খুঁজে পাবার ব্যাপারে আমাকে সাহায্য করবেন? আপনি কি জানেন চশমাটা কার কাছে?

জি না।

প্রথম ভুলটা আমিই করেছি। চশমা সঙ্গে নিয়ে বাথরুমে ঢোকা উচিত ছিল। এমন তো না যে বাথরুমে চশমা রাখার জায়গা নেই। বেসিনে রাখা যেত। তবে একবার বেসিনে রেখেছিলাম। বেসিন থেকে পড়ে চশমার গ্লাস ফ্রেম থেকে বের হয়ে এসেছিল। সরি, আপনাকে আটকে রেখেছি। কিছু মনে করবেন না।

ভদ্রলোক আগের মতোই লাফিয়ে লাফিয়ে সিঁড়ি ভেঙে দোতলায় উঠতে লাগলেন। শামার খুবই মজা লাগছে। কোনো বয়স্ক মানুষকে এইভাবে সিঁড়ি বেয়ে উঠতে সে আগে কখনো দেখে নি। হড়বড় করে অকারণে এত কথা বলতেও শোনে নি। ভদ্রলোক এমনভাবে কথা বলছিলেন যেন শামাকে তিনি অনেকদিন থেকে চেনেন।

হালো কে?

শামা, গলা চিনতে পারছিস না? আমি মুস্তালিব। তোদের বাড়িওয়ালা চাচা।

এই বাড়ির টেলিফোন নাওয়ার আপনি কোথায় পেলেন?

ইচ্ছা থাকলে উপায় হয়। Where there is a will, there is a way. তুই কি অবাক হয়েছিস?

হঁ।

তোর গলাতো আমি চিনতে পারছি না। চিবিয়ে চিবিয়ে কথা বলছিস কেন? একটা জিনিস খেয়াল রাখবি, টেলিফোনে কথা বলার সময় যতটা সম্ভব মিষ্টি গলায়

কথা বলবি। কারণটাও ব্যাখ্যা করি। টেলিফোন কনভারসেশনের পুরোটাই অডিও। মুখ দেখা যাচ্ছে না—গলার স্বরটাই ভরসা। কাজেই সেই স্বরটা মিষ্টি হওয়া বাঞ্ছনীয়। কি আমার কথায় লজিক খুঁজে পাচ্ছিস ?

শামা কিছু বলল না। সে স্বত্ত্বাধ করছে। কারণ মুত্তালিব ঢাচার গলা স্বাভাবিক। তিনি হাসি মুখে কথা বলছেন। কোনো খারাপ সংবাদ থাকলে তিনি এমন হাসিমুখে কথা বলতেন না।

হ্যালো শামা ?

হ্যাঁ শুনছি।

এই টেলিফোন নাম্বার কী করে জোগাড় করলাম সেটা বলি।

কী জন্যে টেলিফোন করেছেন সেটা আগে বলুন।

স্টেপ বাই স্টেপ বলি। তুই এতো ছটফট করছিস কেন ? মনে হচ্ছে পাবলিক টেলিফোন থেকে টেলিফোন করছিস—তোর পেছনে লম্বা লাইন। সবাই তোকে তাড়া দিচ্ছে। শোন শামা, হ্যালো হ্যালো....

শুনছি।

আমি করেছি কী শোন্। প্রথমে এশাকে বললাম, তোমার বোনের ডায়েরি ঘেঁটে দেখ তার কোনো বান্ধবীর নাম্বার লেখা আছে কিনা। সে একজনের নাম্বার দিল। তৃণা মেয়েটার নাম। আমি তৃণার বাসায় টেলিফোন করে এই বাড়ির নাম্বার নিলাম। বুঝেছিস ?

বুঝলাম। আপনার অনেক বুদ্ধি। এখন বলুন টেলিফোন করেছেন কেন ?

টেলিফোন করেছি এটা বলার জন্য যে, বাসায় চলে আয়। আমি তোদের এখানকার ঠিকানা নিয়ে গাড়িও পাঠিয়ে দিয়েছি। এতোক্ষণে গাড়ি পৌছে যাবার কথা।

বাসায় চলে আসব ?

হ্যঁ।

কেন ?

তোর বাবার শরীর খারাপ। বাথরুমে মাথা ঘুরে পড়ে গেছে। এখন ভাল। কিছুক্ষণ আগেও বিছানায় শুয়ে ছিল। এখন দেখে এসেছি বিছানায় বসা। লেবুর সরবত যাচ্ছে। সেকেন্দে সেকেন্দে শামা, শামা, করছে। এই জন্যেই আমার মনে হয় তোর চলে আসাটা ভাল হবে।

শামা হতভয় গলায় বলল, ঢাচা আপনি কী বলছেন ?

আপসেট হ্বার কিছু নেই। তোর বাবা ভাল আছে। ডাক্তার এসে দেখে গেছে। বলেছে চিন্তার কিছু নেই। প্রেসার সামান্য বেশি। প্রেসার কমানোর ওষুধ দেয়া হয়েছে। সিডেটিভ দেয়া হয়েছে। আমি যতদূর জানি এখন নাক ঢেকে ঘুমুচ্ছে।

চাচা আমি আসছি।

তোর কথা শুনে মনে হচ্ছে তুই টেনশনে মরে যাচ্ছিস। টেনশন করার মতো কিছু হয় নি। এভরি থিঙ্ক ইজ আভার কন্ট্রোল। তোর মা শুরুতে খুব ভয় পেয়েছিল। এখন সামলে উঠেছে। তুই বরং এক কাজ কর— বাবাকে দেখে তারপর আবার বিয়ে বাড়িতে চলে যা। সাপ মরল লাঠি ভাঙল না। Snake is dead, stick in tact— হা হা হা।

এত হাসছেন কেন? হাসির কী হল?

তোর টেনশন দেখে হাসছি। ভুল বললাম। টেনশন দেখতে পারছি না। ওধু ফিল করছি।

আমার টেনশন করাটা কি হাস্যকর?

হ্যাঁ, হাস্যকর। ছোটখাট ব্যাপারে যদি এত টেনশন করিস বড় ব্যাপারগুলি কীভাবে সামাল দিবি?

চাচা আমি রাখি।

এখন টেলিফোন রেখে কী করবি? গাড়িতো এখনো পৌছে নি। ততক্ষণ কথা বল।

চাচা, আমার কথা বলতে ইচ্ছা করছে না।

শামা টেলিফোন রেখে দ্রুত নিচে নেমে গেল। মুগালিব চাচার গাড়ি এখনো আসে নি। গাড়ির ড্রাইভার যদি বাসা চিনে আসতে না পারে? আচ্ছা সে কি আতাউরকে টেলিফোন করে আসতে বলতে পারে না? আতাউর তাকে বেবীটেক্সি করে পৌছে দেবে। এতে নিশ্চয়ই দোষের কিছু নেই।

শামা আতাউরের নাম্বার ডায়াল করল। টেলিফোন আতাউরই ধরল। আগের বারের মতো অন্য কেউ ধরল না। শামাকে নানান ভনিতা করে আতাউরকে চাইতে হল না।

শামা হ্যালো বলতেই আতাউর বলল, এশা তোমার খবর কী? দেখলে আমি কেমন গলা চিনি? আমার সঙ্গে একবার মাত্র কথা বলেছ আর আমি গলা মুখস্ত করে রেখে দিয়েছি।

শামা হকচকিয়ে গেল। এশা-প্রসঙ্গটা তার মাথায় একেবারই ছিল না। অথচ

থাকা উচিত ছিল। সে বোকা না, সে বুদ্ধিমতী।

এশা, হ্যালো বলেই চুপ করে গেলে কেন? কোথেকে টেলিফোন করছ?

আমাদের বাড়িওলা চাচার বাসা থেকে করছি। আপনি কেমন আছেন?

ভাল আছি। তোমার বুদ্ধি মতো দোকানটায় গিয়েছিলাম। তোমার আপা বুঝতেই পারে নি যে পুরো ব্যাপারটা সাজানো।

আমারতো মনে হচ্ছে আপনি একটু বেহায়া টাইপ। আপার সঙ্গে হড়ে হড়ে করে বাসায় চলে এলেন। দুপুরে খাওয়া দাওয়া করলেন। আশ্চর্যতো!

কাজটা খুবই বেহায়ার মতো করেছি কিন্তু আমার একটুও খারাপ লাগছে না।

মাই গড, আপনি যেভাবে কথা বলছেন তাতেতো মনে হচ্ছে আপনি আপার প্রেমে পড়ে গেছেন!

তুমি যেভাবে কথা বলছ তাতে মনে হচ্ছে প্রেমে পড়াটা অপরাধমূলক।

অবশ্যই অপরাধমূলক। যে মেয়ের সঙ্গে বিয়ে ঠিকঠাক তার প্রেমে পড়াটা অপরাধ।

অপরাধ কেন?

বিয়ে ঠিকঠাক হওয়া মেয়ের প্রেমে পড়া মানে লাইসেন্স করে প্রেমে পড়া।

তুমিতো খুবই গুছিয়ে কথা বল।

আমি গুছিয়ে কথা বলি টেলিফোনে। সামনাসামনি আমি একেবারেই কথা বলতে পারি না। আচ্ছা শুনুন, আপা কি আপনাকে মাকড়সার ধাঁধাটা জিজ্ঞেস করেছে?

মাকড়সার কোন ধাঁধা?

আপার একটা মাকড়সার ধাঁধা আছে। ঐ ধাঁধাটা সে সবাইকে জিজ্ঞেস করে। আপনাকেও জিজ্ঞেস করবে। আপনার বুদ্ধি টেস্ট করার জন্যে জিজ্ঞেস করবে। ধাঁধার উত্তর দিতে না পারলে আপার মন খারাপ হবে। সে তেবেই নেবে আপনার বুদ্ধি কম।

আমি পারব না। এমিতেই আমার বুদ্ধি কম। ধাঁধার বুদ্ধি আরো কম।

মাকড়সার ধাঁধাটা আপনি পারবেন। কারণ আমি উত্তরটা শিখিয়ে দিচ্ছি। উত্তরটা হলো মাকড়সা দু'রকমের সূতা দিয়ে জাল বানায়। এক রকমের সূতা থাকে আঠা লাগানো। আরেক রকমেরটায় আঠা থাকে না। যে সূতায় আঠা লাগানো থাকে না মাকড়সা তার ওপর দিয়ে হাঁটে বলে সে জালে আটকে যায় না।

আমিতো কিছুই বুঝতে পারছি না তুমি কী বলছ ।

আপনিতো ধাঁধাটা জানেন না, শুধু উত্তরটা জানেন, এইজন্যে কিছু বুঝতে পারছেন না । বুঝতে না পারলেও ক্ষতি নেই । উত্তরটা জেনে রাখুন । আচ্ছা শুনুন আমি রাখি ।

শামা টেলিফোন নামিয়ে ঘর থেকে বের হলো । আর তখনি তার সব বান্ধবীরা সিঁড়ি দিয়ে নামল । বান্ধবীদের সঙ্গে মিঃ হক্কা আছেন । শাহনা ম্যাডামও আছেন । সবাই তাকিয়ে আছে তার দিকে । মিঃ হক্কা কঠিন গলায় বলল, এক্সকিউজ মি, আপনার বান্ধবীরা বলছে, আপনি আমার চশমা আপনার হ্যান্ড ব্যাগে লুকিয়ে রেখেছেন । কাজটা ঠিক করেন নি । জোক ভাল—But not at the expense of some one.

শামা বলল, আমি আপনার চশমা লুকিয়ে রাখি নি ।

তৃণা বলল, তোর হ্যান্ডব্যাগ খুলে দেখিয়ে দে না হ্যান্ডব্যাগে কিছু নেই । এত কথার দরকার কী ?

তৃণা মুখ চেপে হাসছে । শামার বুক ধর্ক করে উঠল । সে এখন পুরোপুরি নিশ্চিত তার হ্যান্ডব্যাগে ভদ্রলোকের চশমা আছে । তৃণা এক ফাঁকে লুকিয়ে রেখেছে ।

শামা হ্যান্ডব্যাগ খুলে চশমা বের করল । তার চোখে পানি এসে যাচ্ছিল । সে অনেক কষ্টে চোখের পানি আটকে বলল, I am sorry.

ভদ্রলোক চশমা নিতে নিতে বললেন— কিছু কিছু অপরাধ আছে শুধু সরিতে কাটা যায় না । যাই হোক, আমি আপনার সরি গ্রহণ করছি । আপনাকে একটা ছেউটি উপদেশ দেবার ইচ্ছা ছিল । দিচ্ছি না, কারণ আমার মনে হয় না আপনার সঙ্গে আমার আবারো দেখা হবে ।

রাত ন'টা । এতক্ষণে মন্তু দু'টা চ্যাপ্টার পড়ে ফেলতে পারত । এখনো সে বই নিয়ে বসতেই পারে নি । একবার বসেছিল, বই খোলার আগেই টপ করে দেয়াল থেকে একটা টিকটিকি বইয়ের ওপর পড়েছে । টিকটিকি বইয়ের ওপর পড়া খুব অলক্ষণ । সে বই বন্ধ করে উঠে পড়েছে । অলক্ষণের সময় পার করে সে আবার পড়তে বসবে । তাছাড়া মনও বসছে না । বাবার জন্য খুব অস্থির লাগছে । বড় আপা অবশ্যি চলে এসেছে । অস্থির ভাবটা এখন অনেকখানি কমেছে । আপা মেয়ে মানুষ । সে কীইবা করবে! তারপরেও মন্তুর মনে হয়, আপা ঘরে থাকা মানেই অনেক কিছু । মন্তু একটু পর পরই দরজা ধরে দাঁড়াচ্ছে বাবাকে দেখেই

চলে যাচ্ছে। তার ওপর দিয়ে সঙ্ক্ষয়ার পর থেকে একের পর এক ঝামেলা যাচ্ছে। তাকেই ডাঙ্গার ডেকে আনতে হয়েছে। চাইনিজ রেস্টুরেন্ট থেকে স্যুপ আনতে হয়েছে। তাকেই অশুধ আনতে হয়েছে।

আবদুর রহমান সাহেব খুব বিশ্বত বোধ করছেন। তাঁর লজ্জাও লাগছে। সবাইকে দুশ্চিন্তায় ফেলে দেয়ার লজ্জা। তিনি পরিবারের প্রধান। তাঁর কর্তব্য সবাইকে দুশ্চিন্তামুক্ত রাখা। বড় মেয়েটা শখ করে বাকবাির বিয়েতে গিয়েছিল। তাকে চলে আসতে হয়েছে। মেয়েটার ঘনটা নিশ্চয়ই খুব খারাপ।

শামা বলল, বাবা স্যুপটা খাও। ঠাণ্ডা হয়ে যাবে।

স্যুপ থেকে মুরগি মুরগি গন্ধ আসছে। ভাতের মাড়ের মতো একটা জিনিস। তার ওপর লতাপাতা ভাসছে। দেখেই অভিজ্ঞ লাগছে। তারপরও মেয়ের মুখের দিকে তাকিয়ে তিনি এক চুমুক স্যুপ মুখে দিলেন।

শামা বলল, স্যুপটা খেতে ভাল লাগছে না?

তিনি বললেন, খারাপ না।

তাহলে খাও। চামচ হাতে নিয়ে বসে আছ কেন?

তিনি পর পর কয়েক চামচ স্যুপ মুখে দিলেন। শামা বলল, শরীরটা কি এখন আগের চেয়ে ভাল লাগছে?

হ্যাঁ।

একটু ভাল না অনেকখানি ভাল?

অনেকখানি ভাল।

স্যুপ খেয়ে শুয়ে পড়।

আবদুর রহমান সাহেব আরো এক চামচ স্যুপ মুখে দিলেন। ভক করে মুরগির গন্ধ নাকে লাগল। শরীর কেমন যেন মোচড় দিছে। বমি হয়ে যেতে পারে। তিনি বমি আটকাবার চেষ্টা করলেন। তাঁর শরীরের কলকজা ভাল না। একবার বমি শুরু হলে বাড়িতে আবারো হৈচে শুরু হবে। মন্টুর পড়া হবে না। পরীক্ষার আগের রাতের রিভিশনটা এক মাসের পড়ার সমান। কাল তার পরীক্ষা। মনেই ছিল না। স্যুপ খাওয়াটা বন্ধ করতে হবে। মেয়ে এমন আঁথহ নিয়ে খেতে বলছে তিনি নাও করতে পারছেন না। মন্টু দরজা ধরে আবারো এসে দাঁড়িয়েছে। তিনি চোখের ইশারায় ছেলেকে কাছে ডাকলেন। মন্টু এগিয়ে এলো।

রিভিশন শেষ হয়েছে?

না।

আমার শরীর ভাল আছে। আমাকে নিয়ে মোটেও চিন্তা করবি না। হাত মুখ
ধূয়ে বই খাতা নিয়ে বসে যা। রাত দু'টা পর্যন্ত পড়বি। দু'টার পর ঠাণ্ডা পানিতে
হাত মুখ ধূয়ে শুয়ে পড়বি। পরীক্ষার আগের রাতে রিভিশন যেমন দরকার, ঘুমও
ঠিক তেমনই দরকার। দু'টার ইলেক্ট্রেসই সমান সমান। ফিফটি ফিফটি। বুবাতে
পারলি ?

মন্টু মাথা কাত করল। শামা বলল, তোমার উপদেশ দেবার কোনো দরকার
নেই বাবা, তুমি সুজ্পটা শেষ কর। ঠাণ্ডা হলে আর খেতে ভাল লাগবে না।

আবদুর রহমান সাহেব নিচু গলায় বললেন, আমি আর খাব না। বমি
আসছে। বাতি নিভিয়ে দিয়ে তুই চলে যা। আমি শুয়ে থাকব।

মাথায় হাত বুলিয়ে দেই ?

দরকার নেই।

তোমার কি ঘুম পাচ্ছে ?

হ্যাঁ।

ঘুম পেলে মাথায় হাত না বুলালেই ভাল। ঘুমের সময় মাথায় হাত বুলালে
ঘুম কেটে যায়।

শামা বাবার ঘরের বাতি নিভিয়ে রান্নাঘরের দিকে গেল।

সুলতানা রান্নাঘরে ঝুঁটি বানাচ্ছেন। শামা মা'র পাশে বসতে বসতে বলল,
ঝুঁটি বানাচ্ছ কেন ?

তোর বাবাকে দেব।

বাবা শুয়ে পড়েছে, কিছু খাবে না।

আজ সারাদিন কিছু খায় নি। অফিসে শুধু একটা কলিজার সিঙ্গাড়া
খেয়েছিল। টিফিন বক্স খুলেও দেখে নি।

এই বয়সে বাবার কলিজার সিঙ্গাড়া খাওয়া একেবারেই ঠিক না। পচা বাসি
কলিজা দিয়ে সিঙ্গাড়া বানায়।....

সুলতানা মেয়ের দিকে তাকিয়ে বললেন, তুই কি বিয়ে বাড়ি থেকে খেয়ে
এসেছিস ?

শামা না-সূচক মাথা নাড়ল।

তাহলে হাত মুখ ধূয়ে আয়, ঝুঁটি খা। না-কি ভাত খাবি ?

ঝুঁটি খাব। গরম গরম ঝুঁটি দেখে লোভ লাগছে।

সুলতানা বললেন, তোর বাঞ্ছবীর বিয়ের উৎসব কেমন জমেছে ?

খুব জমেছে। নানান ধরনের মজা হচ্ছে।

কী হচ্ছে বল, শুনি।

বলতে ইচ্ছা করছে না। বড় মানুষদের বড় মজা।

ওরা কি খুবই বড়লোক?

বড়লোক মানে— ভলস্তুল বড়লোক! মীরাদের বাড়ির প্রতিটা ঘরে এসি
আছে। আমার ধারণা কাজের মেয়েদের ঘরেও আছে।

বলিস কী?

কথার কথা বলছি। কাজের মেয়ের ঘরেতো আর এসি থাকে না।
বড়লোকেরা যা করে নিজের জন্যে করে। অন্যের জন্যে করে না।

মীরার বাবা কী করেন?

ইভান্ট্রি আছে। যাছের ব্যবসা আছে। আরো কী কী যেন আছে।

শামা একটা ঝুঁটি নিয়ে খেতে শুরু করলো।

সুলতানা বললেন, শুধু শুধু ঝুঁটি খাচ্ছিস কেন? তরকারি দিয়ে খা। তিম
একটা ভেজে দেব, তিম দিয়ে খাবি?

উহু।

সবুজ শাড়িতে তোকে যে খুব সুন্দর দেখাচ্ছে এই কথা কেউ বলে নি?

না বলে নি।

সুলতানা বললেন, কুমারী মেয়েদের সেজেগুজে বিয়ে বাড়িতে যাওয়াটা
ভাল। অনেকের চোখে পড়ে। সম্ভব আসে।

সুলতানা মাথা নিচু করে লজ্জিত ভঙ্গিতে হাসতে হাসতে বললেন, তোর
বয়সে আমি যতবার কোনো বিয়ে বাড়িতে গিয়েছি ততবার বিয়ের সম্ভব এসেছে!
এর মধ্যে একটা এসেছিল প্রেনের পাইলট।

পাইলটের সঙ্গে বিয়ে হলো না কেন? বিয়ে হলেতো প্রেনে করে তুমি দেশ-
বিদেশ ঘূরতে পারতে।

বিয়ে কপালের ব্যাপার। কপালের লেখা ছিল তোর বাবার সাথে বিয়ে হবে।
তাই হয়েছে।

আমার কপালে লেখা খাতাউরের সঙ্গে বিয়ে হবে, কাজেই যত সেজেগুজেই
বিয়ে বাড়িতে যাই না কেন আমার কপালে খাতাউর তাই না মা? খাতাউর
সাহেব যে দুপুরে বাসায় খেতে এসেছিল এটা কি বাবাকে বলেছ?

না।

বল নি কেন ?
আছে একটা সমস্যা ।
কী সমস্যা ?
পরে শুনবি ।
পরে শুনব কেন ? এখন বল ।

সুলতানা ছোট্ট নিঃশ্বাস ফেলে বললেন, তোর বাবার ইচ্ছা না ছেলেটার সঙ্গে
তোর বিয়ে হোক । তার যে শরীরটা খারাপ করেছে এইসব ভেবেই করেছে ।

তার মানে ?

তোর বাবা আজ দুপুরে ছেলেটার সম্পর্কে খুব একটা খারাপ খবর পেয়েছে ।
তখনি তার শরীরটা খারাপ করেছে । এত আশা করে ছিল ! হঠাৎ একটা ধাক্কার
মতো খেয়েছে । অফিসেই বমি টমি করেছে ।

খারাপ খবরটা কী ?

আমাকে কিছু বলে নি । তোর বাবাকেতো তুই চিনিস একবার যদি সে ঠিক
করে কিছু বলবে না, পেটে বোমা মারলেও বলবে না ।

খারাপ খবর যেটা বাবা শুনেছেন সেটাতো ভুলও হতে পারে । বিয়ের সময়
প্রায়ই মিথ্যা খবর রাটানো হয় ।

তোর বাবা বলেছে খবর মিথ্যা না ।

শামা তাকিয়ে আছে । সুলতানা মেয়ের দৃষ্টির সামনে বসে থাকতে পারলেন
না । তিনি উঠে দাঁড়ালেন । এশার ঘরে একবার যেতে হবে । মেয়েটা সন্দ্যা থেকে
দরজা বন্ধ করে শুয়ে আছে । তার মাইগ্রেনের ব্যথা উঠেছে । স্বামীকে দেখতে
গিয়ে মেয়ের দিকে তাকানো হয় নি ।

প্রথমে তিনি স্বামীর ঘরে উঁকি দিলেন । মানুষটা ঘুমুচ্ছে । মনে হচ্ছে আরাম
করেই ঘুমুচ্ছে । আরামের ঘুমের সময় মানুষ হাত পা গুটিয়ে ছোট্ট হয়ে যায় ।
বেআরামের ঘুমের সময় মানুষ সরল রেখার মতো সোজা হয়ে থাকে ।

সুলতানা ছেলের ঘরে গেলেন । বেচারার পড়ার আজ অনেক ক্ষতি হয়ে
গেছে । তিনি ঠিক করলেন মন্তু যতক্ষণ পড়বে তিনি পাশে বসে থাকবেন । তার
এই ছেলেটা বোকা টাইপ হয়েছে । ছোটবেলায় এত বোকা ছিল না, যতই দিন
যাচ্ছে বুদ্ধি মনে হয় ততই কমছে । পড়তে পড়তে সে ঘুমিয়ে পড়ে । ধাক্কা দিয়ে
জাগিয়ে দিলে সঙ্গে সঙ্গে পড়তে শুরু করে । এই ছেলের পড়াশোনা হবে বলে
মনে হয় না । পরীক্ষা দিয়ে ফেল করবে । আবার দেবে, কোনো বছর দেবে,

কোনো বছর দেবে না । এই করতে করতে বয়স হয়ে চেহারায় লোক লোক ভাব
আসবে তখন কোনো দোকান টোকান দিয়ে বসিয়ে দিতে হবে । মন্তুর মতো
ছেলেরা খুব ভাল দোকানদার হয় ।

টেবিলে খোলা বই । মন্তু বইয়ে মাথা রেখে আরাম করে ঘুমুচ্ছে । ঘাড়ের
ওপর মশা, রক্ত খেয়ে ফুলে আছে । মন্তুর কোনো বিকার নেই । সুলতানা ছেট
করে নিঃশ্বাস ফেললেন । ছেলেকে ঘুম থেকে তুললেই সে পড়তে শুরু করবে ।
ঘুমিয়ে পড়ার আগ মুহূর্তে যেখানে পড়া শেষ করেছিল সেখান থেকে শুরু করবে,
কিছুক্ষণ ঘুমাক । তিনি এশার ঘরের দিকে রওনা হলেন । খুব সন্তুষ্ট এশাও
ঘুমুচ্ছে । মাইগ্রেনের ব্যথা প্রবল হলে এশা কয়েকটা ঘুমের অমুধ খেয়ে ফেলে ।
ব্যথা কমে যায় কিন্তু ঘুম থেকে যায় ।

এশার ঘরের দরজা ভেজানো । সুলতানা দরজার পাশে দাঁড়াতেই এশা
বলল, ভেতরে এসো মা ।

সুলতানা ঘরে চুকলেন । এই গরমে এশা চাদর গায়ে শুয়ে আছে । তার চোখ
লাল । সুলতানা বললেন, মাথাব্যথার অবস্থা কী ?

এশা বলল, অবস্থা ভাল ।

কমেছে ?

না ।

তাহলে ভাল বলছিস কেন ?

আমার মাথাব্যথা প্রসঙ্গটা এখন একটু বাদ থাকুক । মা আসল ঘটনা
আমাকে বল । আপার বিয়ে বাতিল হয়ে গেছে ?

হঁ ।

হঁ-ফু না, পরিষ্কার করে বল— বাবা কি বিয়ে বাতিল করে দিয়েছেন ?

হঁ ।

ছেলেকে বলেছেন ?

সরাসরি ছেলেকে বলে নি । তার চাচাকে আর বড় বোনকে খবর দেয়া
হয়েছে ।

ছেলের অপরাধটা ?

আমি জানি না । তোর বাবা কিছু বলে নি ।

কাজটা ঠিক করলে না মা । হট করে বিয়ে ঠিক করা, আবার হট করে
বাতিল । বিয়ে তো Play and dust না ।

পে এন্ড ডাস্ট কী ?

পে হচ্ছে খেলা আৰ ডাস্ট হচ্ছে ধুলা । পে এন্ড ডাস্ট হলো— খেলাধুলা । মা
এখন আমাৰ ঘৰ থেকে যাও । তোমাৰ পাথৱেৰ মতো মুখ দেখে আমাৰ মাথা
ধৰা হেড়ে যাচ্ছে ।



শামা,

তুই কি আমার ওপর খুব বেশি রেগে আছিস, তিন দিন
হয়ে গেল এখনো টেলিফোন করলি না। আমি তোর নিষেধ
সত্ত্বেও তোদের বাড়িওয়ালার টেলিফোনে টেলিফোন
করেছিলাম। দু'বার করেছি। প্রথমবার তিনি বলেন, রং
নাঞ্চার। দ্বিতীয়বারে বললেন, শামারা এই বাড়ি ছেড়ে চলে
গেছে। মালিবাগের দিকে বাসা নিয়েছে। রেল ক্রসিং-এর
কাছে। বয়স্ক একজন মানুষ মিথ্যা কথা বললে কেমন লাগে
বলতো। রাগে আমার গা জুলে যাচ্ছে। এই ভদ্রলোককে
আমি একটা শিক্ষা দেব। শামা আমাদের পিকনিকে তুই এই
ভদ্রলোককে ভুলিয়ে ভালিয়ে নিয়ে আয় না। তারপর দেখ
আমি কী করি।

শামা শোন, ঐ দিনের ঘটনায় আমি খুব দুঃখিত।
সামান্য ফান করলাম। এক বঙ্গু আরেক বঙ্গুর সঙ্গে ফান
করতে পারবে না? ভদ্রলোকের চশমা তোর ব্যাগে পাওয়া
গেল। তাতে ক্ষতি কিছু হয় নি। বরং লাভ হয়েছে। কী লাভ
হয়েছে সেটা বলি। মন দিয়ে শোন। ভদ্রলোকতো মোটাঘুটি
অঙ্গের মতোই হাঁটাহাঁটি করছিলেন, চশমা ফেরত পেয়ে
প্রথম তোকে দেখলেন। তুই সবুজ শাড়ি পরে দাঁড়িয়েছিল,
তোকে দেখাচ্ছিল ইন্দ্ৰাণীৰ মতো (ইন্দ্ৰাণী জিনিসটা কী আমি
জানি না। প্রায়ই গঞ্জের বইয়ে পড়ি ইন্দ্ৰাণীৰ মতো সুন্দর।
কাজেই ধরে নিছি ইন্দ্ৰাণী খুবই রূপবতী কেউ)। ভদ্রলোক
তোকে দেখে ধাক্কার মতো খেলেন। রবীন্দ্রনাথের ভাষায়—

বাজিল বুকে সুখের মতো ব্যথা

তুই রাগে দুঃখে কেঁদে ফেললি, তারপর চোখ মুছতে
মুছতে চলে গেলি। তখন আমি হক্কা বাবাজিকে আসল ঘটনা

বললাম। বললাম যে তুই চশমার ব্যাপারটা কিছুই জানিস না। আমি তোর ব্যাগে চশমা লুকিয়ে রেখেছিলাম। ঘটনা শুনে হুক্কা বাবাজি (বাবাজির আসল নাম আশফাকুর রহমান) খুবই মন খারাপ করলেন। তিনি ঠিক করেছেন তোদের বাসায় গিয়ে তোর কাছে ক্ষমা প্রার্থনা করবেন।

আমার ধারণা ইতিমধ্যে তিনি এই কাজটা সেবে ফেলেছেন এবং তোর সঙ্গে হুক্কা বাবাজির কথাবার্তা হয়েছে। আমার এই ধারণার পেছনে কারণ আছে। হুক্কা বাবাজির মা আজ সকালেই আমাকে টেলিফোন করে তোর স্মর্কে খোঁজ খবর করছিলেন। জানতে চাছিলেন তুই মেয়ে কেমন, তোর কারো সঙ্গে এফেয়ার আছে কি-না।

কাজেই বুবাতেই পারছিস ঘটনা অনেক দূর গড়িয়েছে। এখন শুধু গড়াতেই থাকবে। হুক্কা বাবাজিকে যদি বড়শিতে গেঁথে তুলতে পারিস তাহলে বিরাট কাজ হবে। ওদের গুলশানের তিনতলা বাড়ির ছাদে সুইমিং পুল আছে। আমি দেখি নি। মীরার কাছে শুনেছি। পয়সাওয়ালা স্বামী হলো—সোনার চামচ। কথায় আছে না—সোনার চামচ বাঁকাও ভাল। হুক্কা বাবাজি বাঁকা না, সোজা। ভদ্রলোকের ফাইবার অপটিক্সের ওপর পিএইচ.ডি. ডিগ্রি আছে। মেরীল্যান্ড বিশ্ববিদ্যালয়ে অধ্যাপনা করতেন। তার বাবা খুবই অসুস্থ, নিজে ব্যবসাপাতি দেখতে পারছেন না বলে ছেলে এসেছে বাবাকে সাহায্য করতে।

শামা শোন, এই ভদ্রলোকের সঙ্গে যদি তোর কিছু হয়ে যায় (সঞ্চাবনা ৯০ পারসেন্ট), তাহলে তুই কিন্তু প্রতি মাসে একবার তোদের গুলশানের বাড়ির ছাদে পুল সাইড পার্টি দিবি। আমরা সবাই সুইমিং পুলে লাফালাফি ঝাঁপাঝাঁপি করব আর পার্টি করব।

মীরার বিয়ের ঘটনা বলে চিঠি শেষ করি। এত ঝামেলা করে ভিডিওর ব্যবস্থা করা হলো, সেই ভিডিও শেষ পর্যন্ত হয় নি। বর এসেছে রাত তিনটায়। বিয়ে শেষ হতে হতে বেজেছে পাঁচটা। দিনের বেলাতে কি বাসর হয়? ভদ্রলোক তিনতলা পর্যন্ত উঠলেনই না। আমরা খুবই মন খারাপ

করেছি। সবচে' বেশি মন খারাপ করেছেন শাহানা ম্যাডাম।
শেষে ম্যাডামকে বললাম, ম্যাডাম মন খারাপ করবেন না।
আমরাতো অনেকেই আছি বিয়ের বাকি। আমাদের যে
কোনো একজনের বাসর রাত ভিডিওর ব্যবস্থা হবে।

কে জানে হয়ত তোরটাই হবে। কাজেই সাবধান!

ভাল থাকিস এবং আমার ওপর থেকে রাগটা দূর করার
চেষ্টা করিস। তোর নাম রাগ-কুমারী বলেই সারাক্ষণ রেগে
থাকতে হবে না-কি? রাগ মিঃ ছক্কার জন্যে জমা করে রাখ।

ইতি—

তোর দুষ্ট বন্ধু>তৃণা



শামা জেগে আছে। একটু আগে ঘড়ি দেখেছে তিনটা দশ। চোখ জ্বালা করছে। যদিও চোখ জ্বালা করার কোনো কারণ নেই। সে চোখ বন্ধ করে আছে। রোদের দিকে তাকিয়ে থাকলে চোখ জ্বালা করার প্রশ্ন আসত। ঘর অঙ্ককার। যখন ঘুমুতে গিয়েছিল তখন গরমে শরীর ঘেমে যাচ্ছিল। এখন শীত শীত লাগছে। মাথার ওপর ফ্যান ঘুরছে। রাত যতই বাড়ছে ফ্যানের গতি মনে হয় ততই বাড়ছে। দূরে কোথাও বৃষ্টি হচ্ছে কী? আশেপাশে কোথাও বৃষ্টি না হলে এতটা ঠাণ্ডা লাগার কথা না।

শামা আবারো ঘড়ি দেখল। রেডিয়ামের ডায়াল দেয়া ঘড়ি। অঙ্ককারে বিড়ালের চোখের মতো জ্বলে। এখন বাজছে তিনটা বার। মাত্র দু'মিনিট পার হয়েছে, শামার কাছে মনে হচ্ছে অনন্তকাল। অনিদ্রা রোগ মানুষকে এতটা কষ্ট দেয় তা তার জানা ছিল না। তার ছিল বালিশ ঘুম। বালিশে মাথা লাগানো মাত্র ঘুম। আজ এ-কী যন্ত্রণা হলো? আগে চোখ জ্বালা করছিল, এখন মুখ জ্বালা করছে। এই জুলুনি কি শেষ পর্যন্ত সারা শরীরে ছড়িয়ে পড়বে? বিছানায় শুয়ে না থেকে ভেতরের বারান্দায় চলে গেলে কেমন হয়! ভেতরের বারান্দায় কাঠের চেয়ারটা আছে। চেয়ারের পায়টা আবার ভেঙেছে। আবদুর রহমান সাহেব আবার ঠিক করেছেন। এই নিয়ে তিনবার হলো। চেয়ারে বসে সকাল হওয়া দেখা। অনেক দিন সকাল হওয়া দেখা হয় না। আজ দেখবে। না তা করা যাবে না। ফজরের আজান হতেই মা-বাবা দু'জনই উঠে পড়বেন। তাঁরা অজু করতে এসে দেখবেন— তাদের বড় মেয়ে একা একা বারান্দায় বসে আছে। মনের কষ্টে মেয়ে সারা রাত ঘুমুতে পারে নি। তাঁরা দু'জনই খুবই দুঃখিত হবেন। সেটা হতে দেয়া যায় না। শামা মনের কষ্টে ঘুমুতে পারছে না, এটা ঠিক না। তার মনে কষ্ট নেই। তবে তার খারাপ লাগছে।

খারাপ লাগলেই সেই খারাপ লাগাটা অন্যকে দেখাতে হবে কেন? আজ তার জন্যে খারাপ একটা রাত যাচ্ছে। রাতটা কোনো মতে পার করতে পারলে সব ঠিক হয়ে যাবে। একজন লোকের সঙ্গে তার বিয়ে ঠিক হয়েছিল। যে-কোনো কারণে বিয়েটা ভেঙে গেছে। এটা এমন কোনো বড় ঘটনা না। এই

লোকের সঙ্গে বিয়ে হলে তার এক ধরনের ছেলেমেয়ে হত। অন্য আরেক জনের সঙ্গে বিয়ে হলে অন্য ধরনের ছেলেমেয়ে হবে। ব্যাস এইতো! এর বেশি আর কী?

তিনটা কুড়ি বাজে। এই শেষবার ঘড়ি দেখা। শামা ঠিক করে ফেলল সকালের সূর্য ওঠার সঙ্গে সঙ্গে আতাউর নামের মানুষটার ব্যাপারে সে কিছু ভাববে না। আংটিটা ফেরত পাঠাতে হবে। ভাগিয়স সে আংটি আঙুলে আর পরে নি। আতাউরের সঙ্গে শেষবার কি শামা কথা বলবে? হ্যাঁ বলবে, শামা হিসেবে বলবে না। এশা হয়ে বলবে। এই একটা ভাল সুবিধা হয়েছে। এশা সেজে সে অনেক কিছু বলতে পারছে। যাকে বলা হচ্ছে সে কিছুই বুঝতে পারছে না।

শামা ভেবেছিল বাসর রাতে পুরো ঘটনাটা আতাউরকে হাসতে হাসতে বলবে এবং মানুষটার হতভব মুখ দেখবে। মানুষটা নিচয়ই খুব লজ্জা পাবে। বিড়বিড় করে বলবে, তুমি এমন মেয়ে! আশ্চর্য! তখন শামা হঠাৎ শুরু করবে একটা ভূতের গল্প। সে খুব ভাল ভূতের গল্প বলতে পারে। তার নানিজানদের বাড়ির পেছনের জপলে বার তের বছর বয়েসী একটা মেয়ের ডেডবডি পাওয়া গিয়েছিল। মেয়েটা কে? কোথেকে এখানে এসেছে, কেউ কিছু জানে না। ফুটফুটে চেহারা, মাথাভর্তি চুল। ঠোটের কোণায় হাসির রেখা। পুলিশ এল তদন্ত হলো। কিছুই বের হলো না। মেয়েটার কবর হলো—গ্রামের মসজিদের পেছনের কবরস্থানে। তারপর শুরু হলো যন্ত্রণা। গভীর রাতে মেয়েটার কান্না শোনা যায়। লোকজনদের ফিসফিস করে বলে— এই তোমরা আমাকে কবর দিলে কেন? আমি হিন্দু। আমার নাম লীলাবতী। গ্রামের লোকজন অস্ত্রি হয়ে পড়ল। শেষে সবাই মিলে সালিস করে ঠিক করল কবর খুঁড়ে মেয়েটার ডেডবডি বের করে শূশানে নিয়ে পোড়ানো হবে। কবর খোড়া হলো, দেখা গেল কবরে কিছুই নেই। কাফনের কাপড়টা শুধু পড়ে আছে।

ভূতের গল্প শেষ করে শামা ভয় কাটানোর জন্যে একটা মজার গল্প বলবে। যে গল্প বলবে সেটাও ঠিক করা। গল্পটা সবচে' সুন্দর বলতে পারে ত্ণা। তবে সে নিজেও খারাপ বলে না। এক পথচারী অন্য একজনকে জিজ্ঞেস করল, ভাই শুনুন, এই রাস্তাটা কি হাসপাতালের দিকে গিয়েছে? উত্তরে সেই লোক বলল, রাস্তার কি অসুখ হয়েছে যে রাস্তা হাসপাতালের দিকে যাবে?

গল্পগুজব শেষ হবার পর মানুষটাকে পুরোপুরি চমকে দেবার জন্যে সে বলবে, আচ্ছা শুনুন, অনেক গল্প করা হয়েছে। এখন আমার খুব ঘুম পাচ্ছে। গতকাল রাতেও ঘুমুই নি। ঘুমে আমার চোখ বন্ধ হয়ে আসছে। আমি ঘুমাব।

ঘুমের মধ্যে আপনি কিন্তু আমার গায়ে হাত দেবেন না। ঘুমের সময় কেউ আমার গায়ে হাত দিলে আমার খুব খারাপ লাগে। এই বলেই সে পাশ ফিরে শুয়ে গভীর ঘুমের ভান করবে। লোকটা কী করবে? বাধ্য ছেলের মতো চুপচাপ পাশে বসে থাকবে?

আজান হচ্ছে। সুলতানা উঠেছেন। রান্নাঘরের দিকে যাচ্ছেন। চুলায় চায়ের কেতলি বসিয়ে তিনি তাঁর স্বামীকে ডেকে তুলবেন। দু'জনে ফজরের নামাজ পড়ে এক সঙ্গে চা খাবেন। তারপর আবার ঘুমুতে চলে যাবেন। ঘণ্টা খানিক ঘুমিয়ে আবার উঠবেন। এই ওঠা ফাইনাল ওঠা। আগেরটা সেমিফাইনাল। এই রুটিনের কোনো ব্যতিক্রম শামা তার জীবনে দেখে নি। শামা এবং তার বাবা রুটিনের মধ্যে আটকা পড়ে গেছেন। মানুষ অতি দ্রুত রুটিনে আটকা পড়ে যায়। ভালবাসাবাসিও কি এক সময় রুটিনের মধ্যে চলে আসে? রুটিন করে একজন আরেক জনকে ভালবাসে?

শামা বিছানায় উঠে বসল। সে ঠিক করল এক কাপ চা নিয়ে ছাদে চলে যাবে। ছাদে হাঁটতে হাঁটতে চা খাবে। চা খেতে খেতে গুছিয়ে নেবে— এশা সেজে আজ কী কী কথা আতাউর নামের মানুষটাকে বলবে। কথা বলবে কি-না সেটাও ভাবার ব্যাপার আছে। এখন আর কথা বলে কী হবে! তবু সে হয়ত বলবে। কারণ তার কথা বলতে ইচ্ছা করছে। কথা বলতে হবে ন'টার আগে। ন'টার সময় মানুষটা নিশ্চয়ই অফিসে চলে যাবে। শামা কলেজ বাদ দিয়ে ঘরে বসে থাকতে পারে। মানুষটা পারবে না। তাকে বেঁচে থাকতে হলে অফিস করতে হবে। বেতন তুলতে হবে। সে নিশ্চয়ই রুটিনে চুকে পড়া মানুষ।

এখন বাবার গলা পাওয়া যাচ্ছে। বাবার অসুখটা তাহলে সেরে গেছে। তিনি রোজদিনের মতো নামাজ পড়বেন। কোরান তেলাওয়াত করবেন। তারপর ছোট ঘূম ঘুমাতে যাবেন। ঘূম থেকে উঠে নাস্তা খেয়ে ব্যস্ত ভঙ্গিতে অফিসের দিকে রওনা হবেন। তাঁর জীবন আগের মতোই চলবে। শামার জীবনও হয়ত আগের মতোই চলবে। এক সময় আতাউর নামের লোকটার কথা মনেও থাকবে না। অনেক অনেক দিন পর তার নিজের মেয়ে বড় হবে। সে তার বাঙ্কবীর বিয়ে দেখে বাসায় ফিরে মা'র সঙ্গে গল্প করতে বসবে তখন হয়ত শামা হঠাতে করে বলবে, জানিস আমার একজনের সঙ্গে বিয়ে প্রায় ঠিকই হয়ে গিয়েছিল। লোকটার নাম আতাউর। আমি ঠাণ্ডা করে বলতাম খাতাউর।

তার মেয়ে বলবে, ছিঃ মানুষের নাম নিয়ে ঠাণ্ডা করা ঠিক না। নামটাতো সে রাখে নি। বাবা মা রেখেছে।

শামা বলবে, তা ঠিক। তখন আমার বয়স কম ছিল। ঠাট্টা তামাশা করতে খুব ভাল লাগত।

উনার সঙ্গে বিয়ে হলো না কেন?

আমার বাবা কোনো খোঁজখবর না নিয়েই বিয়ে ঠিক করেছিলেন তো।
শেষে তিনি জানতে পারলেন, কিছু সমস্যা আছে।

কী সমস্যা?

জানি না কী সমস্যা, বাবা বলেন নি।

শামা আবারো বিছানায় শুয়ে পড়ল। তার নিজের মেয়েটার কথা ভাবতে ভাল লাগছে। মনে হচ্ছে সত্যি সত্যি তার একটা মেয়ে আছে। এবং মেয়েটা এখন গুটিসুটি মেরে তার পাশে শুয়ে আছে। মেয়েটার গায়ের গন্ধ পর্যন্ত তার নাকে লাগছে। গাদাফুলের পাতা কচলালে যে গন্ধ আসে সেই গন্ধ। আচ্ছা মেয়েটার সুন্দর একটা নাম থাকা দরকার না? তার যেমন দুই অক্ষরে নাম সে রকম দু'অক্ষরের নাম। দু'অক্ষরের নাম হলে নামটা অনেকক্ষণ মুখে রাখা যাবে। টেনে লম্বা করা যাবে। তার নামটা যেমন— শামা...আ-টা অনেকক্ষণ মুখে রাখা যায়। ইচ্ছামত টেনে লম্বা করা যায়। আচ্ছা মেয়েটার নাম আশা হলে কেমন হয়? আতাউরের আ আর শামার শা। কী অস্তুত কাও! আতাউর এখন এল কীভাবে? শামা দু'হাত দিয়ে কল্পনার মেয়েটাকে ঠেলে সরিয়ে দিল। মেয়েটা 'উহ' বলে চিন্কারও করল, কারণ তার চুল মা'র বালিশের নিচে আটকে গেছে। এইসব চিন্তার কোনো মানে হয়! না থাক, নিজের মেয়েকে নিয়ে চিন্তাটা আপাতত থাকুক। অন্য কোনো বিষয় নিয়ে চিন্তা করা যাক।
মজার কোনো বিষয়। আনন্দের কোনো বিষয়।

শামার ঘুম পাচ্ছে। এখন আর ঘুমুতে ইচ্ছা করছে না। এখন ঘুমিয়ে পড়লে দশটার আগে আর ঘুম ভাঙবে না। আতাউরকে টেলিফোন করা যাবে না। টেলিফোন করতেই হবে। এশা সেজে টেলিফোন। পর্দার আড়াল থেকে কথা বলা। এই মজার টেকনিকটা শামা তার মেয়েকে শিখিয়ে দিয়ে যাবে।

শামার ঘরের দরজায় কে যেন হাত রাখল। দরজার কড়ায় সামান্য শব্দ হলো। তারপরই সুলতানার গলা শোনা গেল। তিনি কোমল স্বরে বললেন,
শামা চা খাবি?

শামা বলল, হ্যাঁ।

আয় তোর বাবার সঙ্গে চা খা। তোর বাবা তোকে ডাকছে।

শামা দরজা খুলে বের হলো। মা'র দিকে তাকিয়ে বলল, আমি যে জেগে

আছি তুমি জানতে ?

সুলতানা বললেন, হ্যাঁ।

কীভাবে জানতে ? আমার দরজা ভেতর থেকে বন্ধ। আমি কোনো সাড়া শব্দও করি নি।

সুলতানা ছেটি নিঃশ্঵াস ফেলে বললেন, তোরা তিন ভাইবোনের যে-কোনো একজন জেগে থাকলে বুঝতে পারি। আমার নিজেরো তখন ঘূম হয় না। তোদের মধ্যে সবচে' বেশি রাত জাগে এশা।

বাবা আমার সঙ্গে চা খেতে চাচ্ছেন কেন ?

মনে হয় কিছু বলবে। বিয়ে যে ভেঙে গেল— কেন ভাঙল। এইসব হয়ত তোকে বলবে।

আমি বাবার কাছ থেকে কিছু শুনতে চাচ্ছি না। তুমি শুনে নাও। তারপর যদি ইচ্ছা করে আমি তোমার কাছ থেকে শুনব। ইচ্ছা না করলে শুনব না।

সুলতানা মেয়ের কাঁধে হাত রেখে বললেন, বাবা ডাকলে কখনো না করতে নেই। তোকে ডেকেছে তারপর যদি না যাস তাহলে মনে কষ্ট পাবে। মা'র মনে কষ্ট দিলে কিছু হয় না, কিন্তু বাবার মনে কষ্ট দিলে তার ফল খুব খারাপ হয়। আবদুর রহমান সাহেব শামাকে দেখে একটু নড়ে চড়ে বসলেন। তাঁর হাতে চায়ের কাপ। কাপে চুমুক দিতে যাচ্ছিলেন। চুমুক না দিয়ে কাপ নামিয়ে নিয়ে মেয়ের দিকে তাকিয়ে হাসলেন। শামা বলল, তুমি কিছু বলবে ?

আবদুর রহমান সাহেব নরম গলায় বললেন, দাঁড়িয়ে আছিস কেন ? আগে বোস তারপর বলি। শামা বসল। আবদুর রহমান সাহেব নিজেই মেয়ের হাতে চায়ের কাপ তুলে দিতে দিতে বললেন, আমি হলাম বোকা মানুষ। আমি নিজে বোকা তোর মাও বোকা। দুই বোকা মিলে বিরাট ভুল করে ফেলেছি। এই ভুলের মা বাপ নেই। খোঁজ খবর না নিয়ে তোর বিয়ে ঠিক করে ফেললাম। ছেলেও আসা যাওয়া শুরু করল। কী অবস্থা !

শামা বলল, আসা যাওয়া শুরু করে নি বাবা। একদিনই এসেছিল।

সেই একদিন আসাটাও তো ঠিক না। তোর মা যত্ন করে আবার ভাত খাইয়েছে। তুই আবার তাকে নিয়ে নিউ মার্কেটে বান্ধবীর জন্যে উপহার কিনতে গেলি। তোর মা'র কাছে শুনেছি এক রিকশায় গিয়েছিস। কী ঘিন্নাকর অবস্থা ! তোর অবশ্যি দোষ নেই। দোষটা আমার। আমি গ্রীন সিগন্যাল দেয়ার কারণেইতো বাসায় এসে ভাত খাওয়া শুরু করল। চিন্তা করলেই আমার কেমন যেন লাগে।

একটা মানুষ একবেলা ভাত খেয়েছে এটা এমন কোনো ব্যাপার না বাবা।
কতজনইতো আমাদের বাসায় খেয়েছে। তাতে কী হয়েছে?

আবদুর রহমান সাহেব মেয়ের দিক থেকে দৃষ্টি ফিরিয়ে স্তৰীর দিকে
তাকালেন। হতাশ গলায় বললেন, অনেক কিছুই হয়েছে। এতো নরম্যাল ছেলে
না। পাগল।

সুলতানা হতভস্ত গলায় বললেন, পাগল মানে?

মাথার অসুখ। প্রায়ই হয়। তখন কাউকে চিনতে পারে না। দরজা
তালাবন্ধ করে রাখতে হয়। এমন অবস্থা! এরা অসুখ গোপন করে বিয়ে দিতে
চাচ্ছিল। মানুষের ধারণা আছে না— বিয়ে দিলে পাগল ভাল হয়। তাই
ভেবেছে। কাউকে কিছু না জানিয়ে বিয়ে দিয়ে দেবে। পাগল ভাল হয়ে যাবে।
আমার মেয়ে হবে পাগল ভাল করার ট্যাবলেট। এই ছেলের আগেও একবার
বিয়ে ঠিকঠাক হয়েছিল। পানচিনি হয়েছে। মেয়েপক্ষ খবর পেয়ে পরে বিয়ে
ভেঙে দেয়। গতকাল আমি ছেলের বড় বোনের কাছে গিয়েছিলাম। তিনি ঘটনা
স্বীকার করেছেন। ছেলে যেমন বজ্জাত, আঞ্চীয়স্বজনরাও বজ্জাত। ধরে এদের
চাবকান উচিত। জুতা পেটা করা উচিত। এরা শিয়াল কুকুরেরও অধম।

শামা বলল, এইসব কেন বলছ?

বলব না?

না বলবে না। বিয়ে ভেঙে গেছে ফুরিয়ে গেছে। গালাগালি করবে কেন?

আমি এমন কী গালাগালি করলাম। তুই এত রাগ করছিস কেন?

জানি না কেন রাগ করছি। আমার ভাল লাগছে না। বাবা আমি উঠলাম।

আবদুর রহমান সাহেব চাপা গলায় বললেন, ছেলে যোগাযোগ করার চেষ্টা
করতে পারে। উল্টাপাল্টা বোঝানোর চেষ্টা করতে পারে। একেবারেই পাত্তা
দিবি না। কী সর্বনাশ! আমার মেয়েটাকে আরেকটু হলে একটা পাগলের হাতে
তুলে দিছিলাম!

শামা বাবার সামনে থেকে উঠে চলে এল।

হ্যালো আমি এশা।

বুঝতে পারছি। তুমি কেমন আছ?

আমি ভাল আছি। আপনার গলাটা এমন লাগছে কেন? মনে হচ্ছে আপনি
না, অন্য কেউ কথা বলছে।

আমার মন ভাল নেই। মন ভাল না থাকলে আমার গলার স্বর বদলে যায়।
মন ভাল নেই কেন? বিয়ে ভেঙ্গে গেছে বলে?

আতঙ্গের জবাব দিল না। শামা কিছুক্ষণ জবাবের জন্যে অপেক্ষা করল।
জবাবের জন্যে অপেক্ষা করে ভালই হলো। পরের প্রশ্নটা কী করা যায় ভাবার
সময় পাওয়া যাচ্ছে। কঠিন কঠিন কিছু প্রশ্ন করা উচিত। কঠিন প্রশ্নগুলি মাথায়
আসছে না। বরং উল্টোটা হচ্ছে, শামার গলা ভার হয়ে আসছে।

এশা!

জি।

তোমরা সবাই আমাকে খুব খারাপ ভাবছ তাই না?

আমি ভাবছি না, তবে অন্যরা ভাবছে।

তুমি ভাবছ না কেন?

কারণ আমি আপনাকে খুব ভাল কখনো মনে করি নি। বাবা মনে
করেছেন, এই জন্যেই বাবা মনে কষ্ট পাচ্ছেন। আর আপা খুব কষ্ট পেয়েছে।
সে অবশ্য কষ্টের কথাটা কাউকে বলে নি, কিন্তু আমি বুঝতে পারি।

ও আচ্ছা।

আমি বয়সে অনেক ছোট। কিন্তু আমি কি আপনাকে একটা উপদেশ
দেব?

দাও।

আপনার বিয়ে করা উচিত হবে না। আপনিতো মোটামুটি ধরনের অসুস্থ
না। বেশ অসুস্থ। আমার কথা কি ভুল?

না ভুল না। আমি যখন অসুস্থ হই, বেশ ভালই অসুস্থ হই। আমাকে
তালাবন্ধ করে রাখতে হয়। অসুখটা সেরে গেলে পুরনো অনেক কিছু ভুলে
যাই।

এই অসুখ সারবে ডাঙ্কারো কি এমন কথা বলেছেন?

না বলেন নি। বরং উল্টোটা বলেছেন। বলেছেন— বয়সের সঙে সঙে
অসুখটা বাড়বে।

অসুখের ব্যাপারটা গোপন করাটা কি আপনার ঠিক হয়েছে?

না, ঠিক হয় নি। খুব অন্যায় হয়েছে।

অন্যায়টা করলেন কেন?

তোমার আপাকে দেখে মনে হলো আমার অসুখটা সেরে গেছে। আর

কোনোদিন হবে না । যে অসুখ হবে না আগ বাড়িয়ে সে অসুখের কথা বলতে ইচ্ছা করল না ।

আপার আগে আপনার আরো একটি মেয়ের সঙ্গে বিয়ের কথা হয়েছিল । তাদেরকেও আপনার অসুখের কথা জানান নি । ঐ মেয়েটিকে দেখেও কি মনে হয়েছিল আপনার অসুখ সেরে গেছে ?

আতাউর চুপ করে রইল । এশা বলল, আচ্ছা থাক, এই প্রশ্নের জবাব দিতে হবে না । আপনি কিছু বলতে চাইলে বলুন, আমি টেলিফোন রেখে দেব ।

আমি তোমার আপার সঙ্গে একটু কথা বলতে চাই । তুমি কি ব্যবস্থা করে দেবে ? তাকে দু'একটা কথা বলতে চাই ।

কী কথা ?

এটা তোমার আপাকে বলব । তোমাকে না ।

আপার সঙ্গে কথা বলার সুযোগ পাবেন না । কারণ আপা আপনার সঙ্গে কখনো কথা বলবে বলে মনে হয় না । তাছাড়া আপার অন্য জায়গায় বিয়ের কথাবার্তা হচ্ছে । ছেলের নাম আশফাকুর রহমান । ছেলে মেরীলেন্ড ইউনিভার্সিটির টিচার । মনে হচ্ছে বিয়েটা হয়ে যাবে । এই অবস্থায় কি আপার উচিত আপনার সঙ্গে যোগাযোগ রাখা ?

উচিত না ।

আমি আজ রাখি ? আপনি ভাল হয়ে যান এর বেশি আর কী বলব ।

সেটা সম্ভব না । আমি খুবই অসুস্থ । শোন এশা, তোমার সঙ্গে সরাসরি আমার কখনো কথা হয় নি শুধু টেলিফোনে কথা হয়েছে । শুধুমাত্র তোমার কথা শুনে আমি তোমাকে যে কী পরিমাণ পছন্দ করেছি সেটা একমাত্র আমিই জানি । তোমাকে আমার মনে হয়েছে খুবই কাছের একজন ।

এখনো কি মনে হচ্ছে ?

হ্যাঁ, এখনো মনে হচ্ছে ।

বড় আপার বিয়েতে আপনাকে দাওয়াত দিলে আপনি কি আসবেন ?

হ্যাঁ আসব ।

আপনার লজ্জা করবে না ?

করবে । তারপরেও আসব । তোমার আপার কাছে শুনেছি তুমি একটা ছেলেকে খুব পছন্দ কর । তোমরা খুব শিগগিরই না-কি বিয়ে করবে । তোমার বিয়েতেও আমি আসব । দাওয়াত না করলেও আসব ।

শামা টেলিফোন নামিয়ে রাখল। সে অবাক হয়ে লক্ষ করল তার চোখ
দিয়ে পানি পড়ছে। নিজের ওপরই তার রাগ লাগছে। এর কোনো মানে হয়?
কেন তার চোখ দিয়ে পানি পড়বে?



মুত্তালিব সাহেবের কপালে বিন্দু বিন্দু ঘাম। হাঁটতে তাঁর খুব কষ্ট হচ্ছে। তিনি কয়েকবার বলেছেন, শামা ছেড়ে দে। আর সভ্ব না। শামা বলেছে, আধঘণ্টা আপনাকে হাঁটানোর কথা। আমি আধঘণ্টা হাঁটাব। মুত্তালিব সাহেব হতাশ গলায় বললেন, হাঁটু যে রকম ছিল সে রকমই আছে। হেঁটে লাভ কী?

লাভ ক্ষতি দেখবেন আপনি। আমার আপনাকে হাঁটানোর কথা, আমি হাঁটাব।

তোর হাঁটানোর কথা কেন? তোকেতো কেউ বলে দেয় নি।

এই কাজটা আমি ইচ্ছা করে নিয়েছি। আপনাকে আধঘণ্টা হাঁটালে আমি আধঘণ্টা টেলিফোনে কথা বলতে পারব। আমার লাভ আমি দেখছি।

কাজটা তাহলে নিঃস্বার্থ না?

না।

আজকালতো তোকে টেলিফোন করতে দেখি না।

এখন দেখেন না পরে দেখবেন। আমি কাগজে কলমে হিসাব রাখছি মোট কত ঘণ্টা টেলিফোন পাওনা।

কত ঘণ্টা?

আজকের আধঘণ্টা ধরলে হবে বারো ঘণ্টা।

তোর দৈর্ঘ্য আছে। আধঘণ্টা পার হতে বাকি কত?

এখনো দশ মিনিট।

শামা আজ ছেড়ে দে। মনে হচ্ছে পাঁচা হাঁটু থেকে খুলে পড়ে যাচ্ছে।

খুলে পড়ে গেলেতো ভালই। হাঁটু বাঁকানোর যন্ত্রণা থেকে বাঁচবেন।

তোর মনে মায়া দয়া বলে কিছু নেই। তুই আমার কষ্টটা বুঝতেই পারছিস না।

চাচা এইসব বলে লাভ নেই। ডাক্তার আপনাকে বলেছেন প্রতিদিন আধঘণ্টা হাঁটতেই হবে। আপনার যত কষ্টই হোক এই কাজটা আমি আপনাকে দিয়ে করাব। আপনি হাঁটতে ইন্টারেন্টিং কোনো কথাবার্তা বলুন। দেখবেন

ব্যথা টের পাবেন না ।

মুগ্ধলিব সাহেব দীর্ঘ নিঃশ্঵াস ফেলে বললেন, আমার জীবনে ইন্টারেক্টিং কিছু কখনো ঘটে নি । আল্লাহপাক কী করেন জানিস ? মানুষ বানিয়ে তার পিঠে একটা করে সীল দিয়ে দেন । কারো সীলে লেখা থাকে Interesting Life. তার জীবনটা ইন্টারেক্টিং হয় । আবার কারো সীলে লেখা থাকে Happy Life. তার জীবন হয় আনন্দময় ।

আপনার সীলে কী লেখা ?

কিছুই লেখা নেই । শুধু একটা ক্রস চিহ্ন দেয়া । এই ক্রস চিহ্নের মানে হলো— এই লোকের সব বাতিল ।

শামা হেসে ফেলল । মুগ্ধলিব সাহেবও হাসলেন । শামা বলল, মানুষ হিসেবে আপনি খুব বোরিং । বোরিং মানুষ সামান্য মজার কিছু বললেই মনে হয়— অনেক মজার কিছু বলা হয়েছে । আর আমি যেহেতু খুবই ইন্টারেক্টিং একজন মানুষ, আমার খুব মজার কথাও লোকজনদের কাছে বিরক্তিকর মনে হয় ।

তুই এক কাজ করে— বোরিং পারসন হবার চেষ্টা কর ।

চেষ্টা করছি । লোকজনদের সঙ্গে কথাবার্তা বলা কমিয়ে দিয়েছি । আগে কেউ কোনো প্রশ্ন করলে মজা করে উত্তর দেয়ার চেষ্টা করতাম— এখন শুকনো ধরনের উত্তর দেই । কাঠখোঢ়া জবাব ।

আধঘণ্টা শেষ হয়েছে ?

হঁ হয়েছে ।

যা টেলিফোন করে আয় । আধঘণ্টা না, আজ টেলিফোন করবি এক ঘণ্টা । তারপর তোর সঙ্গে কিছুক্ষণ কথা বলব । পরীক্ষা করে দেখি তুই কী পরিমাণ বোরিং পারসন হয়েছিস ।

টেলিফোন করব না চাচা ।

তাহলে আয় আমরা কথা শুরু করি ।

আজ কথা বলব না চাচা । বাসায় আজ খুব ঝামেলা । বাসায় চলে যাব ।

তোর সঙ্গে কিছু জরুরি কথা ছিল । তোর বিয়ে ভেঙে গেছে শুনেছি । কেন ভাঙল কিছুই জানি না । আবার শুনছি অন্য এক জায়গায় বিয়ে ঠিক হয়েছে । কী ঘটছে একটু বল শুনি ।

শামা সহজ গলায় বলল, সামাজী এন্ড সাবস্টেস বলে চলে যাই । আতাউর রহমান নামে যার সঙ্গে বিয়ে ঠিক হয়েছিল খোঁজ নিয়ে জানা গেল মানুষটা

অসুস্থ । সারা বছর অসুস্থ থাকেন না । মাঝে মাঝে থাকেন । খুব বেশি যখন অসুস্থ হয়ে পড়েন তখন তাঁকে ঘরে তালাবক্ষ করে রাখতে হয় । বুঝতে পারছেন অসুস্থটা কী ?

পারছি ।

আমার অন্য জায়গায় বিয়ের কথাবার্তা হচ্ছে বলে যেটা শুনেছেন, সেটা ঠিক না । বিয়ের কথাবার্তা হচ্ছে না । তবে তৃণা নামে আমার এক বাক্সী আছে, ওর হবি হচ্ছে বাক্সীদের বিয়ে দিয়ে দেয়া । আমাদের তিন বাক্সীর বিয়ের কলকাঠি সে নেড়েছে । আমার ব্যাপারেও নাড়তে শুরু করেছে । বিয়ের ব্যবস্থা করার তার কৌশলগুলি খুব সুন্দর । মুঞ্চ হবার মতো কৌশল । একেক জনের জন্যে একেক কৌশল । আমার জন্যে একটা কৌশল বের করেছে, এবং অনেকদূর এগিয়ে গেছে । অন্য এক সময় আপনাকে বলব । আজ বলতে ইচ্ছা করছে না । চাচা আপনি কি আমাকে আর কিছু জিজেস করবেন ?

না ।

চাচা যাই ?

মুগ্ধালিব সাহেব কিছু বললেন না । তাঁর মন খুবই খারাপ হয়েছে । এই মেয়েটার জন্যে কিছু করতে ইচ্ছা করছে । কী করবেন, কীভাবে করবেন কিছুই মাথায় আসছে না । তিনি জন্মগ্রহণ করেছেন পিঠে ত্রিস চিহ্ন নিয়ে, এ ধরনের মানুষেরা ইচ্ছা থাকলেও কারো জন্যে কিছু করতে পারে না । যে নিজের জন্যে কিছু করতে পারে না সে অন্যের জন্যে কী করবে ?

শামা বাসায় চুকে দেখে বাসার পরিস্থিতি খুবই স্বাভাবিক । অর্থাৎ সে যখন বাসা থেকে বের হয়ে দোতলায় মুগ্ধালিব সাহেবের কাছে চলে গিয়েছিল তখন পরিস্থিতি ছিল ভয়ঙ্কর । আবদুর রহমান সাহেব যে ব্যাপার কখনো করেন না, তাই করছিলেন । রেগে থালা বাসন ভাঙছিলেন, টেবিলের ওপর রাখা দুটা কাপ এবং একটা পানির জগ ছুঁড়ে মারলেন সুলতানার দিকে । সুলতানা ক্ষীণ হৱে বললেন, এরকম করছ কেন ? একটু শান্ত হয়ে বারান্দায় বস । আবদুর রহমান সাহেব চেঁচিয়ে বললেন, কেন শান্ত হব ? আমাকে একটা কারণ দেখাও যার জন্যে শান্ত হব ?

সুলতানা এশার কাছে গিয়ে বললেন, মা যা তোর বাবাকে একটু শান্ত কর । এশা শাড়ি ইঞ্জী করছিল । সে শাড়ি ইঞ্জী এক মুহূর্তের জন্যেও বন্ধ না করে বলল, কোনো দরকার নেই । বাবা আপনা আপনি শান্ত হবে ।

এ রকম করলেতো ট্রোক হয়ে যাবে ।

হয়ে গেলেও কিছু করার নেই ।

সুলতানা কাঁদো কাঁদো মুখে বড় ঘেয়ের কাছে গেলেন । প্রায় মিনিটির গলায় বললেন, শামা তোর বাবাকে একটু সামলা । সারা ঘরে ভাঙা কাচের টুকরা । তোর বাবা খালি পায়ে দাঁড়িয়ে আছে । রাগের মাথায় কোনো দিকে না তাকিয়ে হাঁটবে । কাচের টুকরায় পা কাটবে ।

শামা বলল, বাবার সামনে গেলেই আমি এখন ধমক খাব । আমার ধমক খেতে ইচ্ছা করছে না । আমি এখন ঘরেই থাকব না ।

তুই যাবি কোথায় ?

বাড়িওয়ালা চাচার বাসায় । উনাকে হাঁটাব ।

তোর বাবার এই অবস্থা আর তুই যাচ্ছিস আরেকজনকে হাঁটাতে ?

শামা মাঝের সামনে থেকে সরে দোতলায় চলে এল । চল্লিশ মিনিট পরে ফিরে এসে দেখে সব শান্ত । পশ্চিম রণাঙ্গন নিশ্চৃপ ।

আবদুর রহমান সাহেবের রাগের প্রধান কারণ মন্টু । আজ দুপুরে সে অংক পরীক্ষা দিতে গিয়ে শুনে পরীক্ষা সকালে হয়ে গেছে । কাজেই তার আর পরীক্ষা দেয়া হয় নি । আবদুর রহমান সাহেব সন্ধ্যায় চা খেতে খেতে এই ঘটনা শুনলেন । শান্তভাবেই চা খেলেন । তারপর ছেলের হাত ধরে টেনে ঘর থেকে বের করে রাস্তায় নিয়ে গেলেন । চাপা গলায় বললেন, মানুষের সামনে লজ্জা না দিলে তোর হাঁশ হবে না । রাস্তায় নিয়ে তোকে আমি নেঁটা করে ছেড়ে দেব ।

তিনি এটা করলেন না, তবে যা করলেন তাও ভয়াবহ । ছেলেকে কানে ধরে একশ বার ওঠবোস করালেন । তাদের চারদিকে লোক জমে গেল । রিকশাওয়ালারা রিকশা থামিয়ে ঘন্টা দিতে লাগল ।

আবদুর রহমান সাহেব পুত্রের শান্তি পর্ব শেষ করার পর বললেন, খবরদার তুই বাড়িতে চুকবি না । তোকে ত্যাজ্য বাড়ি এবং ত্যাজ্য পুত্র করলাম । এখন যা, চরে খা ।

মন্টু রাস্তায় দাঁড়িয়ে কাঁদতে লাগল, তিনি বাড়িতে চুকে থালা বাসন ভাঙ্গা শুরু করলেন ।

অল্প সময়ের ভেতরই পরিস্থিতির দ্রুত পরিবর্তন হয়েছে । ভাঙা কাচের টুকরা সরানো হয়েছে । ভেতরের বারান্দার কাঠের চেয়ারে সুলতানা স্বাভাবিক ভঙ্গিতেই বসে আছেন । কে বলবে কিছুক্ষণ আগেই বিরাট বড় গিয়েছে । শামা বলল, বাবা কোথায় মা ?

সুলতানা বললেন, শয়ে আছে।

রাগ কমেছে?

হঁ।

মন্টু ফিরেছে?

না।

এশা কী করছে?

রান্না করছে।

তোমার শরীর ঠিক আছে মা?

হঁ।

শামা রান্নাঘরে চলে গেল। এশা বোনকে দেখে হাসল। যেন এ বাড়িতে
কিছুই হয় নি। শামা বলল, কী রান্না করছিস?

মাংস। বাবা আজ বাংলাদেশের সবচে' প্রবীণ গুরুর মাংস নিয়ে এসেছেন।
এক ঘণ্টার ওপর জ্বাল হয়ে গেছে। যতই জ্বাল হচ্ছে মাংস ততই শক্ত হচ্ছে।

গুঞ্জতো খুব সুন্দর বের হয়েছে।

গুঞ্জে গুঞ্জেই খেতে হবে।

শামা বোনের পাশে বসতে বসতে বলল, তুইতো ভাল রান্না শিখে যাচ্ছিস।
ঐ দিন মাছের ঝোল রান্না করলি, আমি বুঝতেই পারি নি তোর রান্না। আমি
ভেবেছি মা রেঁধেছে।

রান্না শেখার কাজটা আমি মন দিয়ে শিখছি আপা। কারণ শুনতে চাও?
কারণ হচ্ছে— বিয়ের পর আমাদের সংসারে খুব গরিবি হালত চলবে। কাজের
বুয়া রাখতে পারব না। রান্নাবান্না আমাকেই করতে হবে। আমি এমন রান্না
কখনো রাঁধব না যে মাহফুজ মুখে দিয়ে বলবে— কী রেঁধেছে?

তুই এত কিছু চিন্তা করিস?

এশা হাসতে হাসতে বলল, আমি তোমার মতো না আপা। আমি খুবই
চিন্তাশীল তরুণী।

তোর বিয়েটা কবে হচ্ছে?

তোমার বিয়ে না হওয়া পর্যন্ত আমি বিয়ে করব না। তুমি যদি বিয়ে করতে
দশ বছর দেরি কর, আমিও ঠিক দশ বছরই দেরি করব।

কারণ কী?

বললাম না, আমি খুব চিন্তাশীল তরুণী। চিন্তাশীল তরুণী বলেই তোমার

বিয়ের জন্যে অপেক্ষা করব ।

কেন? অপেক্ষা করবি? আমার সঙ্গে তোর কী? সেদিন না বললি আমি আলাদা, তুই আলাদা?

এই সংসারে যতদিন আছি ততদিন আলাদা না। সংসার থেকে বের হলে আলাদা। আপা শোন, আমি কখনো ছট করে কিছু করি না। যাই করি খুব ভেবে চিন্তে করি। আমার সব কিছুর পেছনে একটা পরিকল্পনা থাকে।

শামা আগ্রহ নিয়ে বলল, তোর বিয়ের পরিকল্পনাটা শুনি। থাক এখন না, রাতে ঘুমুতে যাবার সময় শুনব।

এশা হাঁড়িতে পানি দিয়ে নাড়তে নাড়তে বলল, রাতে ঘুমুতে যাবার সময় কিছু শুনতে পারবে না আপা। তখন বাসায় খুব হৈচে হতে থাকবে। কান্নাকাটি হতে থাকবে। এর মধ্যে গল্ল শুনবে কি?

হৈচে কান্নাকাটি হবে কেন?

কারণ মন্টু রাতে বাসায় ফিরবে না। বাবা ছেলের জন্যে অস্তির হয়ে পড়বেন। তাঁর ব্রাউ প্রেসার বেড়ে যাবে। রাত বারটা একটাৰ সময় কাঁদতে কাঁদতে নিজেই ছেলের সন্ধানে বের হবেন। বের হলেও লাভ হবে না। আগামী এক সপ্তাহ তিনি ছেলে খুঁজে পাবেন না।

শামা বলল, তুই তাকে লুকিয়ে রাখার ব্যবস্থা করেছিস?

হ্যাঁ। আমি তাকে মুভালিব চাচার ঘরে রেখে এসেছি। তাঁকে বলে এসেছি মন্টুকে যেন এক সপ্তাহ লুকিয়ে রাখেন। আমি চাই বাবার একটা ভাল শিক্ষা হোক। ছেলের ওপর তিনি যত রাগই করেন, অচেনা অজানা একদল মানুষের সামনে তিনি তাকে লজ্জা দিতে পারেন না।

মা জানে যে, মন্টুকে তুই লুকিয়ে রেখেছিস?

জানেন।

আমিতো এই মাত্রই মুভালিব চাচার কাছ থেকে এলাম। তুই কখন মন্টুকে নিয়ে গেলি?

আমি খুব দ্রুত কাজ করি আপা।

তাইতো দেখছি। এখন শুনি তোর বিয়ের পরিকল্পনা। তুই কথা শুনু করার আগে আমি তোকে একটা কথা বলে নেই। মাথায় আঁচল দিয়ে তুই রান্না করেছিস। তোকে বউ বউ লাগছে। মনে হচ্ছে তুই একটা বিরাট বড় বাড়ির বড় বউ। এবং বাড়িটার সমস্ত ক্ষমতা তোর হাতের মুঠোয়।

আমাকে সুন্দর লাগছে কি-না সেটা বল?

তোকে পরীর মতো লাগছে। মনে হচ্ছে এক্সুণি শাড়ির ফাঁক দিয়ে তোর
পাখা বের হয়ে আসবে।

এশা ছোট করে নিঃশ্বাস ফেলে বলল, তোমার সবচে' বড় গুণ কী জান
আপা? তোমার সবচে' বড় গুণ হলো তুমি চট করে মানুষকে খুশি করে ফেলতে
পার। আমি পারি না। তুমি খুব সুন্দর করে মিথ্যা কথা বল। আমি মিথ্যা কথা
বলতে পারি না। যে মিথ্যা কথা বলতে পারে না তাকে মানুষ ভয় পায়।
ভালবাসে না, পছন্দও করে না।

জ্ঞানের কথা বন্ধ করে তোর বিয়ের পরিকল্পনাটা বল, আমার শুনতে ইচ্ছা
করছে।

এশা বোনের দিকে ফিরল। সে বসেছিল পিঁড়িতে। পিঁড়ি আরেকটু টেনে
নিল শামার দিকে। গলা সামান্য নামিয়ে বলল, আপা শোন, আমি খুব খারাপ
ধরনের, খুবই বাজে টাইপ একটা ছেলেকে বিয়ে করতে যাচ্ছি। কারণ তাকে
আমার খুবই পছন্দ।

কেন পছন্দ?

কেন পছন্দ সেটা আরেকদিন বলব। এখন পরিকল্পনাটা শোন। আমি ঠিক
করেছি তাকে বিয়ে করব কাজি অফিসে। তার বিরুদ্ধে পুলিশের বেশ কয়েকটা
মামলা আছে। সে পালিয়ে পালিয়ে বেড়াচ্ছে, আমি ব্যবস্থা করে রাখব যেন কাজি
অফিসে বিয়ের পর পর পুলিশ তার খোঁজ পায়। কাজি অফিস থেকেই পুলিশ
তাকে ধরে নিয়ে যায়। যেন পরের দুই বা তিন বছর সে জেল থেকে বের হতে
না পারে।

বলিস কী?

এটা ছাড়া আমার কোনো পথ নেই আপা। বিয়ের পর পর সে যদি জেলে
চলে যায়, যদি অনেকদিন সে তার স্ত্রীর সঙ্গে দেখা করতে না পারে, তাহলে সে
যে কষ্টটা পাবে তার কোনো তুলনা নেই। এই কষ্টটাই তাকে বদলে ফেলবে।
বাকি জীবন সে চেষ্টা করবে যেন এক মূহূর্তের জন্যেও আমাকে ছেড়ে থাকতে
না হয়।

তোর কষ্ট হবে না?

আমি ভবিষ্যতের আনন্দটা দেখতে পাচ্ছিতো। আমার কষ্ট হবে না। তোমার
বিয়ে না হওয়া পর্যন্ত আমি কেন বিয়ে করতে পারছি না তা বুঝতে পারছোতো?
যে পরিবারের একটা মেয়ে এমন একজনকে বিয়ে করে, যাকে বিয়ের দিনই পুলিশ
ধরে নিয়ে হাজতে চুকিয়ে দেয়, সেই পরিবারের মেয়েরা কেমন? সেই পরিবারের

অন্য মেয়েদেরতো বিয়ে হবার কথা না । বুঝতে পারছো ?

পারছি ।

কিছু বলবে ?

এত হিসাব নিকাশ করে কি সংসার চলে ? সংসারতো কোনো অংক না ।

কে বলল অংক না ? অংকতো অবশ্যই । জটিল অংক, তবে খুব জটিল না ।
আপা, মাংসের লবণটা চেখে দেখতো লবণ ঠিক হয়েছে কি-না । লবণ চাখতে
আমার কেন জানি সব সময় ঘেঁঘা লাগে ।

রাত দশটার পর থেকে আবদুর রহমান সাহেব খুব অস্তির হয়ে পড়লেন । একবার
বাইরের বারান্দায় গিয়ে দাঁড়ান, একবার যান রাস্তায়, আবার ঘরে ফিরে আসেন ।
সুলতানা বললেন, খেয়ে নাও । রাত হয়ে গেছে ।

আবদুর রহমান সাহেব বললেন, ক্ষিধে নেই ।

সুলতানা বললেন, ছেলেকে নিয়ে চিন্তা করতে হবে না । এসে পড়বে । যাবে
কোথায় ।

আবদুর রহমান সাহেব চাপা গলায় বললেন, গাধা ছেলে । কোথায় না
কোথায় গিয়েছে । রাস্তা হারিয়ে ফেলেছে কি-না কে জানে !

রাস্তা হারাবে না, চলে আসবে ।

কী করে বললে চলে আসবে ? সব কিছু জেনে বসে আছ ? দেখি শার্ট প্যান্ট
দাও ।

শার্ট প্যান্ট দিয়ে কী করবে ?

ছেলে খুঁজে বের করতে হবে না ?

এত বড় শহরে তুমি কোথায় খুঁজবে ?

আবদুর রহমান সাহেব ক্ষিণ গলায় বললেন, আমাকে কী করতে বল ?
খাওয়া দাওয়া করে বিছানায় শুয়ে ঘুমিয়ে পড়ব ? আমার ছেলে ঘরে ফিরছে না
আর আমি বিছানায় শুয়ে থাকব ? তুমি আমার সামনে তালগাছের মতো দাঁড়িয়ে
থাকবে না । আমার সামনে থেকে যাও ।

সুলতানা শামাদের ঘরে গেলেন । গলা নিচু করে বললেন, তোর বাবা
কাঁদছে । মন্টুকে নিয়ে আয় ।

এশা বলল, অসম্ভব । এক সপ্তাহ মন্টুকে লুকিয়ে রাখতে হবে ।

তোর বাবা কাঁদছে ।

কাঁদুক। তোমার ইচ্ছা হলে তুমি কৃমাল দিয়ে বাবার চোখ মুছিয়ে দাও। এক সপ্তাহ আমি মন্টুকে লুকিয়ে রাখব।

সুলতানা শান্ত গলায় বললেন, মা এটা তোর সংসার না। এটা আমার সংসার। তোর সংসার তুই তোর মতো করে চালাবি। আমার সংসার আমি দেখব আমার মতো। মানুষটা হাউমাউ করে কাঁদছে। তোরা যত ইচ্ছা তোদের স্বামীকে কাঁদাস। আমি আমার স্বামীকে কাঁদতে দেব না।

শামা বলল, মা তুমি বাবার কাছে যাও। আমি মন্টুকে নিয়ে আসছি।

মন্টু বেশ সহজভাবেই কার্পেটে বসে টিভিতে এক্স ফাইল দেখছিল। আজকের পর্বটা দারুণ। টেনশনে মন্টুর শরীর কাঁপছে। পর্দা থেকে চোখ সরাতে পারছে না।

শামা যখন বলল, মন্টু যা বাসায় যা। মন্টু বলল, আপা পনেরো মিনিট পরে যাই।

এক্স ফাইল হচ্ছে?

হঁ।

আচ্ছা ঠিক আছে, পনেরো মিনিট পরেই যা।

মুত্তালিব সাহেব নিজের ঘরের খাটে আধশোয়া হয়ে বসে আছেন। শামা ঘরে ঢুকে বলল, চাচা আপনি কি রাতের খাবার খেয়ে ফেলেছেন?

মুত্তালিব সাহেব বললেন, না।

আজ একটু দেরি করে খেতে বসবেন। এশা মাংস রান্না করছে। আমি এক বাটি মাংস দিয়ে যাব।

মাংস দিতে হবে না। রাতে আমি কিছু খাই না। এক গ্লাস দুধ খেয়ে শুয়ে পড়ব।

মুখ বাঁকা করে বসে আছেন কেন? হাঁটু ব্যথা করছে?

হঁ।

পায়ে গরম তেল মালিশ করে দেই?

কিছু মালিশ করতে হবে না।

এরকম করে কথা বলছেন কেন? কী হয়েছে?

কিছুই হয় নি। তোকে দেখে কেন জানি বিরক্ত লাগছে। তুই সামনে থেকে যা। যাবার সময় বাতিটা নিভিয়ে দিয়ে যা।

একটা টেলিফোন করি চাচা ?

যা ইচ্ছা কর ।

শামা বাতি নিভিয়ে চলে গেল । তৃণার সঙ্গে কিছুক্ষণ কথা বলবে । তারপর মন্দুকে নিয়ে বাসায় যাবে ।

মুত্তালিব সাহেবের অন্ধকারে হাসলেন । তাঁর মনটা আজ এই মুহূর্তে খুব ভাল । তিনি উকিল ডাকিয়ে উইল করেছেন । উইলে শামা নামের মেয়েটিকে তাঁর ইহজীবনের সমস্ত সঞ্চয় দিয়ে গিয়েছেন । কাজটা করতে যথেষ্ট ঝামেলা হয়েছে । নিজের কন্যা জীবিত থাকতে অন্য কাউকে বিষয় সম্পত্তি দেয়া যায় না । আইনের জটিলতা আছে । উকিল সাহেবকে আইনের জটিলতা থেকে পথ বের করতে হয়েছে । শেষ পর্যন্ত পথ বের করা গেছে । মুত্তালিব সাহেবে ঠিক করেছেন—যেহেতু আজই কাগজপত্র ফাইনাল হয়েছে আজ থেকেই তিনি শামার সঙ্গে যতদূর সম্ভব খারাপ ব্যবহার করবেন । যেন তাঁর মৃত্যুর পর তাঁর দানপত্রের খবর পেয়ে শামা ফুঁপিয়ে ফুঁপিয়ে তাঁর জন্যে কাঁদে ।

তিনি পিঠে ক্রস দেয়া একজন মানুষ । তাঁর মৃত্যুর পর কেউ কাঁদবে না এই বিষয়টি তাঁকে খুব কষ্ট দিত । আজ তিনি জানেন কেউ কাঁদবে না এটা ঠিক না । একটা মেয়ে কাঁদবে । ফুঁপিয়ে ফুঁপিয়ে কাঁদবে । মুত্তালিব সাহেবের চোখে হঠাৎ পানি এসে গেল ।

তৃণা খলবল করে বলল, শামা তুই আমাকে চাইনিজ খাওয়াবি কি-না বল ।

চাইনিজ খাওয়াবার মতো কিছু ঘটেছে ?

হ্যাঁ ঘটেছে । কবে চাইনিজ খাওয়াবি ?

কথায় কথায় চাইনিজ খাওয়াবার মতো অবস্থা কি আমার আছে ?

টাকা ধার কর । চাচার কাছে থেকে ধার নে । শোন তোর জন্যে কী করেছি । আমার ট্রিকস একশ ভাগ কাজ করেছে । মিঃ হক্কা এড হিজ ফ্যামিলিকে পুরোপুরি কজা করে ফেলেছি । ঐ দিন যদি তোর ব্যাগে মিঃ হক্কার চশমা না রাখতাম তাহলে এটা পারতাম না । হক্কা ফ্যামিলি গোপনে তোদের সব খবরাখবর নিয়েছে । হক্কার মাতা একদিন কলেজে গিয়ে তোকে দেখেও এসেছে । তোর কি মনে পড়েছে হাবাগোবা টাইপের এক মহিলা একদিন কলেজে এলেন ? আমি তাকে দেখে—‘আরে চাচিআম্বা আপনি’ বলে খুব আহাদি করলাম । উনি হচ্ছেন হক্কা-মাতা । এখন ওরা আগামী বৃহস্পতিবার সন্ধ্যায় তোদের বাড়িতে ফরম্যাল প্রস্তাব নিয়ে যাবেন । বুৰুলি কিছু ?

বুঝলাম ।

হুক্কার পিতা খুবই অসুস্থ । এখন মরেন তখন মরেন অবস্থা । কাজেই ব্যবস্থা
এমন থাকবে যে প্রস্তাব দেবার পর প্রস্তাব গ্রাহ্য হলে সঙ্গে সঙ্গে কাজি আনতে
লোক যাবে । বিয়ে হয়ে যাবে । মিষ্টার হুক্কা তার স্ত্রীকে সঙ্গে নিয়ে বারডেমের
হাসপাতালে মৃত্যুপথ্যাত্মী পিতার শয়ার পাশে উপস্থিত হবেন । ঘটনা কেমন
ঘটিয়েছি বল দেখি ?

ভাল ।

বিয়ের প্রস্তাব নিয়ে কে যাচ্ছেন জানিস ? বাংলাদেশের দু'জন অতি বিখ্যাত
ব্যক্তি । তাঁদের পরিচয় আগে দিলাম না । এই অংশটা সারপ্রাইজ হিসেবে থাকুক ।
শামা তুই খুশিতো ?

বুঝতে পারছি না ।

যখন নিজেদের সুইমিংপুলে মনের সুখে সাঁতার কাটবি তখন বুঝবি । শামা
আমি এখন রাখি । কাল তোদের বাসায় এসে সব বলব । চাচা চাচির সঙ্গেও কথা
বলব ।

আচ্ছা ।

আসল কথাইতো বলতে ভুলে গেছি রে । এতক্ষণ শধু নকল কথা বললাম ।
আসল কথা হলো— আগামীকাল দুপুরে তুই আমার সঙ্গে চাইনিজ খাবি ।

ঐ ভদ্রলোক থাকবেন ?

হ্যাঁ থাকবেন । যার সঙ্গে বিয়ে হচ্ছে তাকে একটু বাজিয়ে নিবি না ? সামান্য
লাউ কেনার সময়ও তো মানুষ লাউ-এ চিমটি দিয়ে দেখে, টোকা দিয়ে দেখে ।
তুই টোকা দিবি না ?

আচ্ছা ।

এরকম শুকনো গলায় কথা বলছিস কেন ? তোর উচিত আনন্দে লাফানো ।
আমি তোর জন্যে কী করলাম এটা তুই এখন বুঝতে পারবি না— দশ বছর পর
বুঝবি । মনে থাকে যেন আগামীকাল দুপুর । তোর কোনো শাদা শাড়ি আছে ?
শাদা শিফন ?

না ।

আচ্ছা শাদা শাড়ি আমি নিয়ে আসব । মেয়েদের সবচে' মানায় ধ্বনিবে শাদা
শাড়িতে । আমাদের দেশের মেয়েরা শাদা শাড়ি পরে না— কারণ শাদা
বিধবাদের রঙ । তুই পরবি ধ্বনিবে শাদা রঙ, গলায় থাকবে মুক্তার মালা । ঠোঁটে
গাঢ় করে লাল লিপস্টিক দিবি । শাদার ভেতর থেকে লাল রঙ লাফ দিয়ে বের

হবে। তোর কি মুক্তার মালা আছে?

না।

অসুবিধা নেই আমি জোগাড় করব।

শামা টেলিফোন নামিয়ে কিছুক্ষণ চুপচাপ দাঁড়িয়ে রইল। তারপর আতাউরের নামারে ডায়াল ঘুরাল। একজন মহিলা ধরলেন। নরম গলায় বললেন, তুমি কে?

শামা বলল, আমার নাম এশা। আমি আতাউর ভাইয়ের সঙ্গে একটু কথা বলতে চাচ্ছিলাম।

ও অসুস্থ। ওকেতো দেয়া যাবে না।

কী হয়েছে?

ও অসুস্থ।

এই বলেই মহিলা টেলিফোন রেখে দিলেন। শামা মূর্তির মতো দাঁড়িয়ে রইল। তার কাছে মনে হচ্ছে বাড়িটা কাঁপছে। সে এক্ষুণি পড়ে যাবে।

আশফাকুর রহমান নীল ব্রেজার পরেছেন। এই গরমে কেউ ব্রেজার পরে না, তিনি পরেছেন। তাঁকে দেখে মনে হচ্ছে ব্রেজার ছাড়া অন্য কিছু পরলে তাঁকে মানাতো না। শামার কাছে মনে হলো—বিয়ে বাড়িতে ভদ্রলোককে একরকম দেখাচ্ছিল, আজ অন্যরকম দেখাচ্ছে। বিয়ে বাড়িতে তাঁর মধ্যে ছেলেমানুষি ভাব ছিল। আজ নেই।

আশফাকুর রহমান ত্বরণে দিকে তাকিয়ে বললেন, তুমি না বললে তোমরা ছ'জন বাঙ্কবী এক সঙ্গে থাকবে?

ত্বরণ বলল, ছ'জন না, সাতজন। মীরার বিয়েতে আমাদের একজন যেতে পারে নি। সেও আজ থাকবে। তবে তারা সবাই আসবে এক ঘণ্টা পর। শুরুতে থাকব আমরা তিনজন।

ও আচ্ছা।

আপনি শামার কাছে ক্ষমা চাইবেন বলেছিলেন। চেয়েছিলেন?

না। উনার সঙ্গে পরে আর দেখা হয় নি।

এইতো দেখা হলো, ক্ষমাটা চেয়ে নিন। ক্ষমা প্রার্থনা দৃশ্য দিয়ে আজকের টোকাটুকি খেলা শুরু হোক।

টোকাটুকি খেলা মানে?

টোকাটুকি খেলা আপনি খুববেন না। আমরা বান্ধবীরা অনেক সাংকেতিক ভাষা ব্যবহার করি। কই ক্ষমা প্রার্থনা শুরু করুন।

শামাকে অবাক করে দিয়ে ভদ্রলোক উঠে দাঁড়ালেন। মধ্যে বক্তৃতা দেয়ার ভঙ্গিতে কথা বলা শুরু করলেন। ক্ষমা প্রার্থনা নিয়ে তৃণা মজা করছিল, ভদ্রলোককে দেখে মনে হচ্ছে তিনি মজা করছেন না।

বিয়ে বাড়ির ঐ রাতের ঘটনার জন্যে আমি খুবই লজ্জিত। আপনাকে অপ্রস্তুত করার জন্যে আপনার বান্ধবীরা যে এই কাণ্টা করবে তা আমার মাথাতেও আসে নি। আমি যে কী পরিমাণ লজ্জা পেয়েছি তা শুধু আমি জানি।

শামা বলল, লজ্জা পাওয়ার মতো এমন কিছু আপনি করেন নি। আপনি দাঁড়িয়ে থাকবেন না, বসুন।

ভদ্রলোক বসলেন। তৃণা বলল, শামা এখন তোকে খুব জরুরি একটা কথা বলছি, মন দিয়ে শোন— আশফাকুর রহমান সাহেবের বাবা খুব অসুস্থ। বেশির ভাগ সময়ই তাঁকে অস্থিজেন দিয়ে রাখতে হচ্ছে। তিনি তাঁর একমাত্র ছেলের একটা গতি হয়েছে এটা দেখে যেতে চান। কাজেই আমাদের দায়িত্ব হচ্ছে উনার জন্যে চমৎকার একটা মেয়ে খুঁজে বের করা। তোর জানা মতো কেউ আছে?

শামা তাকিয়ে আছে। কী বলবে ত্বেবে পাচ্ছে না। ভদ্রলোক শামার দিকে তাকিয়ে বললেন, আপনার বান্ধবীর কথায় সামান্য ভুল আছে। ভুলটা আমি ঠিক করে দেই। আমার বাবা প্রচণ্ড শারীরিক কষ্টে আছেন। এই অবস্থায় একজন মানুষ নিজের কষ্ট ছাড়া অন্য কিছুই ভাবতে পারে না। কাজেই তিনি তাঁর পুত্রবধূর মুখ দেখে মরতে চাচ্ছেন এটা খুবই ভুল কথা। তবে আমার আত্মায়স্বজনরা এ ধরনের কথা বলছেন এটা ঠিক। আমার ধারণা ঢাকা শহরের সব রূপবতী মেয়েদের প্রাথমিক ইন্টারভু ইতিমধ্যেই নেয়া হয়ে গেছে।

তৃণা বলল, একজন শুধু বাকি আছে। শামা বাকি আছে। শামার ইন্টারভু আপনি নিয়ে নিন। তবে আপনার ইন্টারভুর আগে শামা আপনার বুদ্ধি পরীক্ষা করবে। বুদ্ধি পরীক্ষায় আপনি যদি ফেল করেন তাহলে তার ইন্টারভু নিয়ে কোনো লাভ নেই। শামা আপনার দিকে ফিরেও তাকাবে না।

ভদ্রলোক আগ্রহের সঙ্গে বললেন, বুদ্ধি পরীক্ষাটা কী রকম?

তৃণা বলল, মাকড়সা নিয়ে একটা ধাঁধা। বেশ কঠিন পরীক্ষা। প্রায় নবুই পারসেন্ট লোক এই পরীক্ষায় ফেল করে। কাজেই সাবধান!

শামা বলল, তৃণা আপনার সঙ্গে ঠাণ্ডা করছে। ধাঁধা জিজ্ঞেস করে কি আর মানুষের বুদ্ধি পরীক্ষা করা যায়?

ভদ্রলোক বললেন, তবু শুনি। আমার শুনতে ইচ্ছা করছে।

তৃণা বলল, শামা লজ্জা পাচ্ছে। সে বলবে না। তার হয়ে আমি প্রশ্নটা করছি। মনে রাখবেন এর উত্তর না দিতে পারলে কিন্তু সঙ্গে সঙ্গে শামা আপনাকে বাতিল করে দেবে। মুখে অবশ্য কিছু বলবে না। কাজেই সাবধান।

ভদ্রলোক তৈরি দৃষ্টিতে তৃণার দিকে তাকিয়ে আছেন। মনে হচ্ছে তিনি চ্যালেঞ্জটা গ্রহণ করেছেন। উত্তেজনায় তাঁর ফর্সা মুখে লালচে আভা দেখা যাচ্ছে। নাকের ডগায় বিন্দু বিন্দু ঘাম।

শামার কাছে মনে হচ্ছে বিয়ে বাঢ়িতে ভদ্রলোকের ভেতর যে ছেলেমানুষি দেখা গিয়েছিল, সেই ছেলেমানুষিটা আবার ফিরে এসেছে। তৃণা মাকড়সার ব্যাপারটা বলছে। ভদ্রলোক চোখের পাতা না ফেলে শুনছেন। মনে হচ্ছে সত্য সত্য তিনি ভয়ঙ্কর কোনো পরীক্ষা দিতে বসেছেন।

শামার হঠাতে করেই মনে হলো এই ভদ্রলোকের সঙ্গে বিয়ে হলেও তার মেয়ের নাম রাখা যাবে আশা। আশফাকুর রহমানের আ, শামার শা। আশা।



বারান্দার কাঠের চেয়ারের হাতলে একটা কাক বসে আছে।

সুলতানার বুক ধ্বক করে উঠল। এটা কি কোনো অলঙ্কণ ? কা কা করে কাক ডাকাটা অলঙ্কণ। কিন্তু একটা কাক বিম ধরে অনেকক্ষণ ধরে চেয়ারে বসে থাকলে তার মানে কী হয় ? কাক চুপ করে বসে থাকার পার্থি না। সে খাবারের খৌজে ছটফট করবে। ঘাড় বাঁকিয়ে গৃহস্থকে দেখবে। এই কাজটা সে করছে না। বিম ধরে বসে আছে। সুলতানা রান্নাঘরে চুকলেন। এশাকে কাক সম্বন্ধে জিজ্ঞেস করতে হবে। তিনি জানেন, এশা লঙ্কণ-অলঙ্কণ বিষয়ে কিছুই জানে না। আধুনিককালের মেয়েদের লঙ্কণ বিচারের সময় নেই। তবু মনের শান্তির জন্যে জিজ্ঞেস করা।

সুলতানা চিন্তিত ভঙ্গিতে বললেন, এশা একটা কাক তোর বাবার চেয়ারের হাতলে অনেকক্ষণ ধরে বসে আছে।

এশা পায়েস রাঁধছিল। পায়েস রান্নার প্রধান কৌশল ক্রমাগত হাঁড়ির দুধ নাড়াচাড়া করা। একটু থামলেই দুধ ধরে যাবে। পায়েসে দুধ পোড়া গন্ধ এসে যাবে। সে চামচ নাড়তে নাড়তেই বলল, কাক বসে আছে তো কী হয়েছে ?

কোনো অলঙ্কণ না তো ?

এশা হেসে ফেলল। সুলতানা বললেন, কাকটাকে দেখে ভাল লাগছে না।

কাক দেখে ভাল লাগার কোনো কারণ নেই মা। কাকতো যয়ূর না যে দেখে ভাল লাগবে। আজ সকাল থেকে তুমি লঙ্কণ বিচার শুরু করেছ। দয়া করে মনটা শান্ত কর। পায়েসের মিষ্টি একটু চেখে দেখ।

সুলতানা মিষ্টি চাখলেন। মিষ্টি বেশি হয়েছে না কম হয়েছে কিছুই বললেন না। তিনি খুবই অস্থির বোধ করছেন। তাঁর অস্থির বোধ করার সঙ্গত কারণ আছে। শামার আজ রাতেই বিয়ে হয়ে যাবার সম্ভাবনা দেখা দিয়েছে। তাঁর উদ্যোগে আনা পাত্রের সঙ্গে বিয়ে সম্পর্কিত সব কথাবার্তা শেষ হয়েছে। পাত্রের নানিকে চিটাগাং থেকে আনা হয়েছে। তিনি সন্ধ্যার পর লোকজন নিয়ে শামাকে দেখতে আসবেন। তিনি যদি বলেন, মেয়ে পছন্দ হয়েছে, তাহলে সঙ্গে সঙ্গে

বিয়ে পড়ানো হবে।

আবদুর রহমান সাহেবকে কাজি এনে রাখার কথা বলা হয়েছে। তাঁর নিকট আজীয়স্বজনকেও খবর দিয়ে রাখতে বলা হয়েছে। আবদুর রহমান সাহেব বলেছেন, আমি সব খবর দিয়ে রাখলাম। কাজি নিয়ে আসলাম আর ছেলের নানি বললেন, মেয়ে পছন্দ হয় নি তখন?

এতে পাত্রের মামা (ব্যারিস্টার)। ইমরুল হক। হাইকোর্টে প্রাকটিশ করেন।) খুবই বিরক্ত গলায় বললেন, ছেলের নানি এ ধরনের কথা বলবেন না। আমরা সব ঠিকঠাক করে তবেই উনাকে আনিয়েছি। উনি আমাদের সবার মূরগিব। এই জন্যেই উনাকে সামনে রাখা, আপনি কি আমাদের কথায় ভরসা পাচ্ছেন না?

আবদুর রহমান সাহেব বিব্রত গলায় বললেন, কেন ভরসা পাব না? অবশ্যই ভরসা পাচ্ছি। ভরসা না পাবারতো কিছু নেই।

সমস্যা থাকলে বলুন কাজি আমরা নিয়ে আসব। আপনাদের কিছু করতে হবে না।

না না কোনো সমস্যা নেই।

আমরা তাড়াতাড়ি করছি কারণ ছেলের বাবা অসুস্থ। বারডেমে আছেন। যে-কোনো মুহূর্তে এক্সপায়ার করতে পারেন। উনি যেন ছেলের বউ দেখে যেতে পারেন সেই ব্যবস্থা। বুঝতে পারছেন?

জি পারছি।

আপনাকে দেখে খুবই চিন্তিত মনে হচ্ছে। আপনি কি চিন্তিত?

জি না, চিন্তিত না। শুধু শুধু চিন্তিত হব কেন?

আবদুর রহমান সাহেব মুখে বললেন শুধু শুধু চিন্তিত হব কেন? আসলে তিনি খুবই চিন্তিত বোধ করছেন। এত বড় ঘরে তাঁর মতো সাধারণ মানুষের সম্পর্ক করাটা ঠিক হচ্ছে কি-না বুঝতে পারছেন না। তাঁর চেয়েও অনেক বেশি চিন্তিত সুলতানা। সুলতানার চিন্তার প্রধান কারণ— আজ সন্ধ্যার আগে যদি ছেলের বাবা মারা যায় তাহলে তো আজ বিয়ে হবে না। এবং অবশ্যই পাত্র পক্ষ পিছিয়ে পড়বে। তাদের মধ্যে কেউ না কেউ বলবে, মেয়ে অলঙ্কণা। বিয়ের কথা হলো অমি ছেলের বাবা গেল মরে। শুন্দর-খাকি কল্যা!

সুলতানা আজ সকাল থেকে যে শুধু লক্ষণ বিচার করছেন, এই কারণেই করছেন। শুধু কাকের ব্যাপারটা ছাড়া লক্ষণ বিচারের ফলাফল শুভ। অনেক দিন বৃষ্টি হচ্ছে না। আজ সকাল থেকেই আকাশ মেঘে মেঘে কালো। আকাশের

ভাব দেখে মনে হয় যে-কোনো সময় বৃষ্টি শুরু হবে। বিয়ের দিন বৃষ্টি শুভ।

বিয়ের দিন এশাকে দিয়ে পায়েস রান্না বসিয়েছেন— এর মধ্যেও সুলতানার একটা গোপন পরীক্ষা আছে। বিয়ের দিন কনের বাড়িতে রান্না করা পায়েস যদি ধরে যায়, কিংবা পুড়ে যায়, কিংবা পাতিল উল্টে পায়েস মাটিতে পড়ে যায়, তাহলে বিরাট অলঙ্কণ। এশার রান্না করা পায়েস খুব ভাল হয়েছে। এটা একটা ভরসার কথা। সুলতানা এক বাটি পায়েস এনে শামার ঘরে ঢুকলেন। শামা খুব মনোযোগ দিয়ে পায়ের নখ কাটছিল। সে নেইল কাটার থেকে চোখ না তুলেই বলল, পায়েস খাব না মা, দেখেই ঘেন্না লাগছে।

পায়েস দেখে ঘেন্না লাগার কী আছে?

ঈদের দিন ছাড়া অন্য যে-কোনো দিন পায়েস দেখলে আমার ঘেন্না লাগে।

একটু চেখে দেখ।

চেখেও দেখব না। আজ আমার বিয়ের দিন। অন্তত আজকের দিনে আমাকে দিয়ে জোর করিয়ে কিছু করাবে না।

তোর বান্ধবীরাতো এখনো কেউ এল না?

সবাই আসবে। এখন তো মাত্র সকাল দশটা বাজে। এত টেনশন করছ কেন মা? শান্ত হয়ে একটু আমার পাশে বসতো।

সুলতানা বসলেন। শামা নখ কাটা বন্ধ রেখে মাঘের দিকে তাকিয়ে বলল, মা তুমি আমাকে একটা পরামর্শ দাওতো।

কী পরামর্শ?

খাতাউর সাহেব বিষয়ক একটা পরামর্শ।

সুলতানা ক্ষীণ স্বরে বললেন, ওর কথা আসছে কেন?

শামা বলল, ওর কথা আসছে কারণ ওরা আমাকে এক হাজার এক টাকা এবং একটা আংটি দিয়ে গিয়েছিল। আমার মনে হচ্ছে আজই এইসব ওদের ফেরত দেয়া উচিত। আমি বাড়িওয়ালা চাচাকে বলে রেখেছি উনি তাঁর গাড়িটা আমাকে তিন ঘণ্টার জন্যে দিয়েছেন। আমি মন্টুকে নিয়ে বের হব। দু'একটা টুকটাক শপিং করব— তারপর খাতাউর সাহেবের বোনের বাসায় গিয়ে তার বোনের হাতে জিনিসগুলি দিয়ে আসব। তোমার দুশ্চিন্তাগ্রস্ত হবার কোনো কারণ নেই। খাতাউর সাহেবের সঙ্গে আমার দেখা হবে না— কারণ উনি খুবই অসুস্থ। ছাদের চিলেকোঠার ঘরে তাঁকে বেশ কিছুদিন হলো তালাবন্ধ করে রাখা হচ্ছে।

তুই এত খবর কোথায় পেলি?

মাবো মাবো আমি ঐ বাসায় টেলিফোন করি ।

কেন ?

মানুষটার অসুখটা কমল কিনা এটা জানার জন্যে টেলিফোন করি । এই মানুষটাতো আমার স্বামীও হয়ে যেতে পারত । পারত না ? এখন আমাকে অনুমতি দাও, আমি আংটি ফেরত দিয়ে আসি ।

সুলতানা চিন্তিত গলায় বললেন, তোকে যেতে হবে কেন ? আংটি ফেরত দিতে হলে তোর বাবা গিয়ে ফেরত দিয়ে আসবে ।

শামা শান্ত স্বরে বলল, আংটিতো তারা বাবাকে দেয় নি । আমাকে দিয়েছে । কাজেই আংটি আমাকেই ফেরত দিতে হবে ।

সুলতানা বললেন, তুই আমার পরামর্শ চেয়েছিলি । আমার পরামর্শ হলো— তুই যাবি না ।

শামা বিছনা থেকে নামল । বুক শেলফ থেকে একটা বই বের করল । বইয়ের মাঝখানে রাখা একটা চিঠি বের করে মা'র দিকে বাড়িয়ে দিয়ে বলল, তুমি চিঠিটা পড় । তারপর আমাকে বল আমার যাওয়া উচিত হবে, কি হবে না ।

কার চিঠি ?

খাতাউর সাহেবের চিঠি ।

সে আবার কবে চিঠি লিখল ?

তিনি অসুস্থ হবার আগে চিঠিটা লিখেছেন ।

সুলতানা নিচু গলায় বললেন, আমিতো কিছুই বুঝতে পারছি না । সে চিঠি লিখবে কেন ? তুই কি এই চিঠির জবাব দিয়েছিস নাকি ?

শামা বলল, এত কথা বলছ কেন মা ! চিঠিটা তুমি আগে পড়তো ।

সুলতানা চিঠি পড়েছেন । চিঠি পড়তে গিয়ে তাঁর হাত কাঁপছে ।

শামা,

তোমার কাছে এই চিঠি লিখতে খুব অস্বস্তি লাগছে,
খানিকটা লজ্জাও লাগছে । একবার ভাবলাম এই চিঠি
লেখাটাতো তেমন জরুরি না । না লিখলেও চলে । কিন্তু
পরে মনে হলো চিঠিটা না লিখলে নিজের কাছে ছেট হয়ে
থাকব । অন্তত এইটুকু আমার ব্যাখ্যা করা উচিত কেন আমি
অসুখের ব্যাপারটা পুরোপুরি গোপন রাখলাম । আমার
ব্যাখ্যাটা যে তোমার কাছে গ্রহণযোগ্য হবে তা আমার মনে

হচ্ছে না। আমার নিজের কাছেই ব্যাখ্যা গ্রহণযোগ্য না।
তাহলে ব্যাখ্যাটা দিচ্ছি কেন? মানুষের স্বভাব হচ্ছে খুব বড়
ধরনের ভুল করলেও— কেন ভুল করল তার একটা ব্যাখ্যা
সে দাঁড় করায়। যতটা না অন্যের জন্যে তারচে' বেশি
নিজের জন্যে। মূল কথা না বলে অন্য গীত গাইছি—
তোমার নিশ্চয়ই খুব বিরক্ত লাগছে। একটু ধৈর্য ধর, এক্ষুণি
আমার সব কথা বলা হয়ে যাবে। আমার ছেলেবেলার
একটা গল্প বলব। গল্পটা শেষ হওয়া মানে আমার সব কথা
শেষ হওয়া।

আমার তখন সাত বছর বয়স। ফ্লাস টুতে পড়ি। জন্ম
থেকেই অসুখ বিসুখ আমার লেগেই আছে। দু'দিন পর পর
জুরে পড়ি। ঠাণ্ডা লাগলেই সর্দি-কাশি। বাবা আমার অসুখ
নিয়ে খুবই বিরক্ত। একদিন আমার মা'কে বললেন—
শুধুমাত্র তোমার পুত্রের চিকিৎসার জন্যে বাড়িতে একজন
ডাক্তারকে জায়গির রাখা দরকার। ডাক্তার ঘরেই থাকবে,
খাবে আর বাব মাস আমার ছেলের চিকিৎসা করবে। তবে
আমি সিদ্ধান্ত নিয়েছি— ওর চিকিৎসা আমি করব। প্রতিদিন
আমার সঙ্গে সে এক মাইল হাঁটবে। ফজরের নামাজের পর
একে তুমি কানে ধরে বিছানা থেকে তুলবে। আমি রোজ
একে নিয়ে সান্ধিকোনা পুলের কাছের বটগাছ পর্যন্ত যাব।
আবার ফিরে আসব। এই চিকিৎসার নাম হাঁটা চিকিৎসা।
এই চিকিৎসা এক মাস করলে তোমার ছেলের আর কোনো
চিকিৎসা লাগবে না। বড়, বৃষ্টি, তুফান, সাইক্লোন, টাইফুন
কোনো অবস্থাতেই এই হাঁটা চিকিৎসা বন্ধ হবে না।

বাবা কথা যা বলেন কাজও তাই করেন। জমিদারি
ভাবভঙ্গি আমাদের পরিবারে কারোর মধ্যেই ছিল না। শুধু
বাবার মধ্যেই ছিল। আরম্ভ হলো আমার হাঁটাহাঁটি।

শুরুতে ব্যাপারটা যত ভয়ঙ্কর হবে বলে আমার মনে
হচ্ছিল দেখা গেল ব্যাপার তেমন ভয়ঙ্কর না। বাবার মতো
গম্ভীর ভারিকী ধরনের মানুষও সারা পথই আমার সঙ্গে গল্প
করেন। যে বাবার ভয়ে বাড়ির সবাই তটস্থ হয়ে থাকে দেখা
গেল সকালবেলায় বাবা সেই বাবা না। সকালবেলায় বাবা

খুবই মজার একজন মানুষ। এক এক দিন তিনি একেক
রকম মজা করতে করতে হাঁটেন। আমি মহাউৎসাহে তাঁর
আঙুল ধরে থাকি। আমার বড়ই ভাল লাগে।

একদিন ভোরে আকাশ খুব মেঘলা করেছে। বৃষ্টি নামি
নামি করছে। বাবা আমাকে নিয়ে বের হবেন। মা বললেন,
দিন খারাপ। ঝড় বৃষ্টি হবে। আজ বের না হলে হয় না?

বাবা ধমক দিয়ে বললেন, কী বলেছিলাম— ঝড়, বৃষ্টি,
তুফান, সাইক্লোন কোনো অবস্থাতেই হাঁটা বন্ধ হবে না?

মা বললেন, ছাতা নিয়ে যান।

বাবা বললেন, ছাতা কীসের? বৃষ্টি হলে ভিজতে
ভিজতে যাব। এতে শরীর পোক হবে। সামান্য ঠাণ্ডা বাতাস
লাগলেই, সর্দি জুর এইসব হবে না।

আমি বাবার হাত ধরে রওনা হলাম। সান্ধিকোনা
পুলের বটগাছের কাছে যাওয়ার আগেই তুমুল বর্ষণ শুরু
হলো। বাবা বললেন, বৃষ্টিতে ভিজতে কেমন লাগছেরে
ব্যাটা?

আমি বললাম, ভাল।

বাবা হাসতে হাসতে বললেন, এক কাজ কর, শার্ট
প্যান্ট খুলে নাংগু বাবা হয়ে যা। আশেপাশে দেখার কেউ
নেই। সারা শরীরে বৃষ্টির পানি লাগলে জীবনে কোনো দিন
ঘামাচি হবে না।

আমি বললাম, লজ্জা লাগে।

বাবা বললেন, দূর ব্যাটা! কে দেখবে? দেখবে শুধু
আল্লাহপাক। আল্লাহপাকের কাছে কীসের লজ্জা?

আমি শার্ট খুলে ফেলেছি। প্যান্ট খুলতে যাব হঠাৎ
দেখি বাবা যেন কেমন করছেন। যে হাতে তিনি আমাকে
ধরে ছিলেন, সেই হাত কাঁপছে। তিনি বিড়বিড় করে
বললেন, বাবারে মহাবিপদ। আজ আমার মহাবিপদ!

আমি দেখলাম বটগাছের পেছন থেকে পাঁচ ছ'জন
মানুষ বের হয়ে এল। খুবই সাধারণ গ্রামের চাষাভূষা
মানুষ। তারা আমাদের দিকে দৌড়ে আসতে শুরু করল।

পরের ঘটনাগুলি ঘটল অতি দ্রুত। আমি দেখলাম এরা বাবাকে কাদার ভেতর ফেলে দিয়েছে। একজন গুরু জবাই করার মস্ত বড় ছুরি বের করেছে। বাবা গোঙ্গাতে বলছেন, তোমরা আমার একটা কথা রাখ। এই দৃশ্য যেন আমার ছেলেটা না দেখে। তাকে সরায়ে নিয়ে যাও। আমাকে দয়া করার দরকার নেই, আমার ছেলেকে দয়া কর।

এই দয়া তারা করল না। বাবার কাছ থেকে চার পাঁচ হাত দূরে দাঁড়িয়ে এক ভয়ঙ্কর দৃশ্য আমি দেখলাম। লোকগুলি যেমন দ্রুত এসেছিল সে রকম দ্রুতই চলে গেল। আমি দাঁড়িয়ে রইলাম আমার জবাই করা বাবার পাশে। কী বৃষ্টি! বাবার ওপর বৃষ্টির পানি পড়ছে। আর সেই পানি দেখতে দেখতে টকটকে লাল হয়ে যাচ্ছে। আমি এক মুহূর্তের জন্মেও বাবার ওপর থেকে দৃষ্টি সরিয়ে নিতে পারলাম না। আমি তাকিয়েই রইলাম।

সেই থেকে আমার অসুখের শুরু।

দুই তিন বছর পর পর বর্ষার সময় অসুখটা হয়। যখন খুব বৃষ্টি হতে থাকে। তখন বৃষ্টির দিকে তাকালে— হঠাৎ মাথার ভেতরটা ফাঁকা হয়ে যায়। হঠাৎ মনে হয় আমি একটা খোলা মাঠে দাঁড়িয়ে আছি। আমার গায়ে বৃষ্টির ফোঁটা পড়ছে আর বৃষ্টির ফোঁটাগুলি অত্তুত উপায়ে লাল টকটকে হয়ে যাচ্ছে।

আমাকে সুস্থ করার অনেক চেষ্টা করা হয়েছে। বড় বড় ডাক্তাররা আমাকে দেখেছেন। আমাকে কোলকাতায় নিয়ে যাওয়া হয়েছে। সেখানে একজন বড় সাইকিয়াট্রিস্ট আমাকে দেখেছেন। কোনো লাভ হয় নি। সেই সাইকিয়াট্রিস্ট আমাকে বলে দিয়েছিলেন, আমি যেন কখনো বৃষ্টি না দেখি। আকাশে মেঘ করলেই আমি যেন ঘরে চুকে দরজা জানালা বন্ধ করে বসে থাকি। সে চেষ্টাই এখন করি।

এই হলো আমার গল্প। খুবই ভয়ঙ্কর গল্প, আমি চেষ্টা করেছি সহজভাবে বলতে। তা কি আর সম্ভব? এমন ভয়ঙ্কর গল্প কি আর সহজ করা সম্ভব?

শামা এখন বলি আমি আমার অসুখের কথাটা কেন
গোপন করলাম। কেন জানি এক সময় আমার মনে হলো—
প্রবল বৃষ্টির সময় কেউ যদি গভীর মমতায় আমার হাত ধরে
থাকে এবং আমার কানে কানে বলে— কোনো ভয় নেই।
আমি তোমার পাশে আছি। আমি তোমার হাত ধরে আছি।
আমি এক মুহূর্তের জন্যেও হাত ছাড়ব না। তাহলে হয়ত
আমার অসুখটা হবে না। এক সময় বৃষ্টিটা আমার কাছে
সহনীয় হয়ে উঠবে। কে জানে একদিন হয়ত সেই মেয়েকে
সঙ্গে নিয়ে বৃষ্টিতে ভিজতেও পারব!

আমার এ ধরনের চিন্তার পেছনে কোনো যুক্তি ছিল না,
ছিল বিশ্বাস। ডুবন্ত মানুষ খড়কুটো চেপে ধরে— আমিও
তাই করতে চেয়েছি।

আমি খুবই ভুল করেছি। আমিতো আর তোমাদের
মতো সুস্থ সামাজিক মানুষ না। ভুলতো আমি করবই।

শেষবার এশার সঙ্গে যখন কথা হয়েছে সে আমাকে
বলেছে অন্য এক জায়গায় তোমার বিয়ের কথা হচ্ছে।
তোমার খুব ভাল বিয়ে হোক এটা আমি মনেপ্রাপ্তেই কামনা
করছি। তোমার সঙ্গে আমার অতি সামান্য পরিচয় যেন
কোনো অবস্থায়ই তোমার মনে কোনো ছাপ না ফেলে এই
প্রার্থনা করছি।

আরেকটা কথা— মাঝে মধ্যে এশা টেলিফোনে আমার
সঙ্গে কথা বলেছে। এই নিয়ে তুমি তার ওপর রাগ করো
না।

এই চিঠিটা এশাকে দেখিও। শেষবার টেলিফোনে
আমার সঙ্গে তার কথা বলার ভঙ্গি থেকেই বুঝেছি সে
আমার গোপন করার ব্যাপারটায় খুব কষ্ট পেয়েছে।

এই চিঠিটা পড়লে তার কষ্ট সামান্য কমতেও পারে।

ইতি
আতাউর

সুলতানা চিঠি ভাঁজ করে টেবিলে রাখলেন।

শামা বলল, মা তুমি কিছু বলবে ?

সুলতানা চুপ করে রইলেন। শামা শান্ত গলায় বলল, মা তুমি বল আমি
কি উনার সঙ্গে দেখা করে বলব— চিঠিটা পড়ে আমার খুব মন খারাপ হয়েছে।
আপনার ওপর আমি খুব রাগ করেছিলাম ঠিকই। এখন আর আমার কোনো
রাগ নেই। বল মা, এটাও কি আমি বলব না ?

সুলতানা জবাব দিলেন না। চুপ করে রইলেন।

শামা মুত্তালিব সাহেবের গাড়ি নিয়ে বের হয়েছে। মুত্তালিব সাহেব নিজেও
গাড়িতে আছেন। তিনি শামাকে নিয়ে পেছনের সীটে বসেছেন।

খুম বৃষ্টি হচ্ছে। এমন বৃষ্টি যে গাড়িতে বসে বাইরের কিছুই দেখা যাচ্ছে
না। মুত্তালিব সাহেব বললেন, এই বড় বৃষ্টির মধ্যে আমরা কোথায় যাচ্ছি ?

শামা বলল, জানি না চাচা।

মুত্তালিব সাহেব বিরক্ত গলায় বললেন, তুই কোথায় যাবি তা না জেনেই
বের হয়েছিস ?

শামা বলল, আমরা কী করব, না করব তা কি আমরা সব সময় জানি ?

মুত্তালিব সাহেব জবাব দিলেন না। তিনি হঠাৎ লক্ষ করলেন, শামা
কাঁদছে। টপটপ করে শামার চোখ দিয়ে পানি পড়ছে।

শামা বলল, চাচা আমি গাড়ির কাটটা নামিয়ে দেই ?

মুত্তালিব সাহেব বললেন, ভিজে যাবি তো।

চাচা আজ আমার ভিজতে ইচ্ছা করছে।

মুত্তালিব সাহেব নরম গলায় বললেন, তোর যা করতে ইচ্ছে করে তুই
কর। আমি আছি তোর সঙ্গে। মা-রে তুই কাঁদছিস কেন ?

শামা জবাব দিল না। সে জানালার কাচ নামিয়ে মুঝ হয়ে বৃষ্টি দেখছে।
সে কী করবে ? সে কি গাড়িতে করে খানিকক্ষণ ঘুরে বাসায় ফিরে যাবে ? যে
মানুষটা মাকড়সা ধাঁধার জবাব ঠিকঠাক দিতে পেরেছিল তার সঙ্গে জীবন শুরু
করবে ?

না-কি আতাউর নামের মানুষটার কাছে উপস্থিত হয়ে বলবে, হ্যালো
মিস্টার। আসুনতো আমার সঙ্গে বৃষ্টি দেখবেন। আজ আমরা বৃষ্টি বিলাস করব।
কোনো ভয় নেই। আমি সারাক্ষণ আপনার হাত ধরে রাখব। এক মুহূর্তের
জন্যেও হাত ছাড়ব না। কী করবে শামা ?

শামা কাঁদছে। শাড়ির আঁচলে সে চোখ মুছছে। কোনো বড় সিন্ধান্ত সে নিয়ে নিয়েছে। মন্ত বড় কোনো সিন্ধান্ত নেবার আগে আগে মেয়েদের চোখে সব সময় পানি আসে।
